



Lukim pes 13

Isipla wei long promotim bisnis bilong yu

GUTPELA KWALITI, GUTPELA PRAIS LONG PNG

Bisnis Kads **K120** | **K175**

200 kads + takis
Printin tasol
Wanpla sait, ful kala 300 gsm pepa.

200 kads + takis
wantaim disain wok

Only at... **THEODIST LTD**
THE STATIONERY SUPERMARKET
Waigani Drive, POM Maricham Road, LAE
Php: 313 9000 / 7232 1300 Php: 472 5488 / 7091 7854
sales@theodist.com.pg saleslae@theodist.com.pg

KOLIM MIPLA NAO!

Bogenvil laikim indepedens

- PNG gavman i no givim ful K500m
- Referendum long 2019
- Oposisen i tok amamas long Momis



OTDF hausing invesmen: CMCA komyuniti i selebretim invesmen bihain long gavana i katim ribon long makim opening. (Long lef go long rait) Deputi CEO bilong OTML Musej Werror, OTDF CEO Ian Middleton (namel) na Gavana Wobiro (rait). Stori long pes 4.

Stanley Nondol i raitim

PRESIDEN bilong Atonomas Bogenville Gavman (ABG), Dokta John Momis i laikim ol pipel long Atonomas Rijon (ARoB) i mas vot long kism indepedens long 2019 na singaut long PNG gavman long wok bung wantaim em long Bogenvil Pis Agrimen i mas karim kaikai.

PNG Gavman na ol pipel bilong ARoB i gat agrimen long Bogenville Pis Agrimen olsem ol pipel bai vot long referendum long bruk lus long PNG na kamap indepedens long 2019. Narapela em long tromoi ol a gan we ol bin yusim long taim bilong Bogenvil pait moa long 20 krismas i go pinis. Mista Momis bihain long Sif Jas, Sir Salamo injia, i swerim em na ol 40 memba i go long ABG Palamen long dispela wik, i tok ol pipel i redi long vot na lukluk long 2019 long kism indepedens.

Somare gavman i bin tok promis olsem PNG gavman bai givim K500 millien long stretim ol developmen na rot bilong referendum na indepedens. K100 milien long wan wan yia stat long 2010.

PNG gavman i no givim ful K500milien na namba tri Palamen i wetim dispela mani long mekim ol bikpela wok redi bilong referendum.

Long wankain taim, PNG Oposisen i givim bikpela tok amamas i go long Presiden Momis long winim sia bilong em namba tu taim long ABG Palamen.

Oposisen lida, Don Polye, long wanpela midia stepmen i tok Bogenville em i impoten long PNG na i tok PNG gavman i mas givim ful sapot na rispektim laik bilong ol pipel long rijon wantaim tingting bilong ol long go long referendum.

I go moa long pes 2

Talk more for just K1 a day

Subscribe to our K7 weekly pass. Dial *123*7#.

Get 7 days **UNLIMITED FREE CALLING** Between Bmobile-Vodafone numbers

20 MB Internet data

10 MIN Calls to any network in PNG

20 SMS Text to any network in PNG

Contact us now!
Customer Care 76003555
support@bmobile.com.pg

www.bmobile.com.pg

4-pela meri stap long ABG palamen

Stanley Nondol i raitim

ILEKSEN bilong Atonomus Bogenville Gavman i lukim 4-pela meri i win long resis na i kisim sia long palamen we planti man i save ranim.

Tripela meri i win long ol sia bilong ol meri stret long 3-pela rijon na wanpela i resis wantaim ol man na win.

Isabel Peta i win long Saut Bogenville, Marcelline Kokiai i win long Sentral Bogenville na Francisca Semoso win long Not Bogenville na tu winim sia bilong deputi spika long flua bilong palamen.

Na Josephine Getsi i resis wanataim ol man kendidet na win long Peit Konstituensi.

ABG gavman i swerim tripela memba go insait long palamen i makim ol Eks-Kombaten o ol pastaim paitman long makim tripela rijon long makim ol paitman long palamen.

Pastaim paitman, Ben Malatan i winim sia bilong Eks Kombaten long Not Bogenville, Thomas Tari winim Saut Bogenville na Noah Doko kisim sia bilong Sentral Bogenville.

Palamen long Bogenville em balens, i gat makim bilong ol meri long wanwan rijon, i gat makim bilong ol bipo paitman o Eks Kombaten na Spika bilong palamen em i no memba, em man ausait long rulum palamen gut. Na em bai no inap wansait.

Na ileksen bilong Bogenville em bin kamap gut wantaim nogat hevi o trabel.

Ekting Praitim Minista Leo Dion i tok bikpela amamas long ol pipel bilong Bogenville long kamapim demokretik ileksen long makim ol lida bilong ol go insait long namba tri palamen.

Mista Dion i tok PNG gavman i redi long sapotim ABG long ol wok insait long Bogenville pis agrimen na wanpela bilong

agrimen namel long ABG na PNG gavman em long PNG gavman bai helpim ABD long vot long referendum na kisim independens long 2019.

Presiden Momis i tok ol pipel bilong Bogenville i lukluk long PNG gavman bai mekim karim kaikai ol toktok stap long Bogenville pis agrimen.

Presiden Momis tu i tok PNG gavman i no mekim inap wok long sapotim ABG na i tok nau em i taim long wok bung namel long tupela gavman.

Mista Momis i tok ol toktok bilong kirapim Panguna main i go het yet na ABG i gat plen long sapotim ol pipel long SME bisnis na ol arapela bisnis long rijon.

Em i tok senis long Bogenville Maining Ekt em wanpela eria ABG i lukluk wantaim Panguna main long helpim ol pipel.

ABG palamen makim nupela spika

-Spika em i no memba

Stanley Nondol i raitim

NAMBA TRI palamen bilong Atonomus Bogenvil Gavman (ABG) i makim nupela spika bilong palamen long dispela wik Mande.

Pastaim klak bilong PNG Nesenel Palamen Simon Pentanu i kamap namba tri spika bilong Bogenvil palamen bihain long ol pipel long Atonomus Rijon bilong Bogenville (AROB) i pinisim ileksen na makim ol nupela memba wantaim presiden.

Ol 40 memba bilong ABG gavman i makim

nupela spika bihain long Sif Jastis bilong Papua Niugini i swerim ol i go insait long palamen.

Palamen long ABG em i no wankain long PNG palamen. Klek em i no memba bilong palamen, em i man nating ol memba bilong ABG i nominetim na votim.

Mista Pentanu i kisim 23 vot na pastaim spika Andrew Muriki i kisim 17 vot. Mista Muriki i bin stap tupela tem long palamen stat long 2010.

Bihain long en, Mista Pentanu i kolim nominesen bilong

deputi spika na Francesca Semoso i winim sia bilong deputi wantaim 28 vot.

Misis Semoso i win long sia bilong ol meri makim Not Bogenville.

Ol siaman bilong 3-pela rijon bilong AROB i tok ol i gat bilip long Mista Pentanu olsem wanpela pastaim klak bilong nesenel palamen long mekim gut wok na kamapim planti senis long palamen.

ABG palamen i gat 39 memba na presiden John Momis i mekim kamap 40.

Presiden John Momis i winim sia bilong em bek wantaim moa long 30,000 vot.

Mista Momis i tokim bikpela kibung long Hutjena olsem ol pipel bilong AROB na ABG i lukluk long vot long referendum long kamap independens long 2019.

Bihain long ileksen presiden Momis i makim ke teka kabinet i lukautim ol ministri long ABG gavman na wanpela bilong ol em meri, Josephine Getsi husat i win long Peit Konstituensi.

ABG gavman i gat 3-pela rijon, Saut Bogenville i wantaim 14-pela memba, Sentral Bogenville 10, na Not Bogenville 16 memba.

TFF Komoditi Komponen Ripot i kam bek

Frieda Sila Kana i raitim

TUISEN FI FRI (TFF) Komoditi Komponen Program em i wanpela we gavman i karim hevi bilong edukesen long helpim ol pipel.

Long las wik, wanpela praivet PNG kampani husat i bin mekim wok bilong bringim ol skul metiriel i go long ol skul long kantri i bin kam bek na givim ripot i go long Minista bilong edukesen, Nick Kuman.

Treid Print Kampani i bin kisim wok bilong traim long kamapim ol mekpas bilong ol sumatin olsem hap bilong givim fri edukesen long olgeta skul pikinini long kantri, stat long elementeri i go long praimer skul inap long gret 12 sekenderi skul. Dispela program i lukim dispela kampani i raun karamapim ol skul insait long olgeta 89 distrik bilong kantri.

Long Fraide las wik, Jeneral Menesa bilong Treid Print Ltd, Mista Wilson i bin givim ripot bilong dispela program i go long Minista Kuman long Edukesen opis long FINCORP haus long Pot Mosbi.

Long 2012 Treid Print i bin kisim dispela kontrak long kamapim na bringim olgeta samting bilong skul i go long ol sumatin na ol tisa.

Mista Wilson i tok, wantaim 25 yia ekspirens bilong Treid print long kamapim ol samting bilong skul, ol i kisim dispela wok long mekim wok wantaim ol tisa, sumatin na olgeta lain husat i gat wok long lukautim ol skul fi na ol matiriel bilong skul.

"Samting tru em bilong

luksave olsem mani bilong fri edukesen i mas senis na kamapim kwaliti edukesen long soim tru wok bilong pablik-patnasip-sios patnasip. Tasol mipela wokim planti samting long kamapim sistem we mipela inap kisim hevi long en. Mipela i go liklik moa long mekim sampela sistem we kontrak i no tok long mekim, tasol mipela ting em i gutpela long we bilong lukautim mani samting," Mista Wilson i tok.

Em i tok, kain sistem ol i kamapim em bai stopim pasin bilong 'gris mani go pastaim wok bai kamap.'

Em i mekim luksave long ol Memba bilong ol Distrik husat i bin inap long baim haia bilong ol balus na kar na sip long karim ol kago bilong ol skul i go long ol ples i longwe tru long taun. Dispela program em i makim wanpela sumatin, wanpela skul kit.

Dispela program i kisim K40 milien bilong TFF.

Long wankain taim Minista bilong Edukesen, Nick Kuman i apim nem bilong Treid Print na mekim luksave long gutpela wok tru ol i mekim. Em i tok wok bilong bringim samting i go stret long ol lain husat bai yusim em i bikpela hatwok. Em i tok sampela taim em i fri, em i bin go wantaim Treid Print tim nae m i lukim tru bikpela hevi long edukesen wankain long ol narapela sevis i stap.

"Mi lukim ol pikinini na ol komyuniti soim smail long pes em i mekim mi wari tru. Sampela taim mi askim, sapos no gat ekse-sais buk em ol bai rait olsem wanem. Ol i tok em

bai ol i yusim lip bilong banana o lip bilong saksak long rait," Mista Kuman i tok.

"Ol kain ples olsem Chambri Lake, na Oksapmin o Maramun em ol hatpela ples long go insait. Ol pipel inap long kisim sik na dai long kain ol doti wara na i no gat marasin tasol God i save lukautim ol pipel na ol i save stap," Minista Kuman i tok.

Tasol em i tok moa olsem nau em i putim bikpela salens long dipatmen bilong em long kirap na soim trupela kala bilong wok bilong ol. Em i tok insait long dispela program em i lukim planti masrum skul i kamap nating na i no bihainim sistem bilong edukesen.

Olsem na em i tok strong long ol opisa bilong edukesen dipatmen i mas mekim bisnis bilong ol long kamapim ol sistem we bai ol i ken save long wanem skul i stap long wanem Lokal Level Gavman, wanem distrik na long wanem provins.

Mista Kuman i salensim Ekting Seketeri bilong Edukesen na ol opisa long ol moa long save long namba bilong ol pikinini tru i stap long ol dispela skul tu.

Em i tok K15 milien i go lus nating bilong wanem i no gat gutpela databes bilong ol skul. Edukesen dipatmen i no gat gutpela sistem i stap.

"Ekting Seketeri na ol senia menesmen, yupela i mas stretim ol toksave na tok stori bilong yupela gut na yupela i mas bihainim trupela stori. Dispela em i as bilong yumi gat ol standet opisa long olgeta 89 distrik," Minista Kuman i tok.

Bogenvil laikim independens

I kam long pes 1...

Mista Polye i singaut long O'Neill gavman long givim K500 milien o moa long sapotim wok bilong Presiden Momis long ol pipel bilong em i ken redi long independens.

Mista Polye i skruim tok tenkyu bilong em i go long pastaim Sif Obusmen na Klak bilong Palamen, Simon Pentanu long kisim wok bilong Spika long ABG Palamen.

Gren Sif Sir Michael Somare na

Presiden John Momis tupela wantaim i papa bilong kantri na i bin go pas long independens bilong PNG.

Sir Michael wantaim ol sampela minista bilong PNG gavman, Komisina bilong Polis na CS i bin stap long dispela taim bilong swering in bilong namba tri ABG Palamen na selebret wantaim ol pipel long Buka long dispela wik Mande.

Ileksen long Bogenville i kamap gut

wantaim no gat trabel.

Long ol 40 memba bilong namba tri ABG Palamen, Saut Bogenvil i gat 14 memba, Not Bogenvil 16 na Sentral Bogenvil i gat 10-pela.

Tripela meri i makim tripela rijon wantaim tripela Eks Kombaten i makim bipo paitman long taim bilong Bogenville pait i bin go insait long dispela namba tri ABG Palamen.



Jeneral Menesa bilong Treid Print Ltd, Mista Wilson wantaim Ekting Seketeri bilong Edukesen, Dokta Uke Kombra na Minista bilong Edukesen, Nick Kuman i holim wanpela kopi bilong ripot bilong TFF Komoditi Komponen long las wik Fraide.

Poto: Frieda Sila Kana



Noken lus tingting long baim Wantok Niuspepa today!

K1 tasol!!

Aumia bris wetim ol pats long kam-Woks menesa

James G. Kila i raitim

LONGPELA Aumia bris long Madang-Ramu haiwe long Madang provins i stap krungut yet na no gat wok i kamap long en yet bikos Woks Dipatmen i wetim yet sabmisen o askim i go long Nesenel Gavman long wokim nupela bris klostu long dispela olupela bris.

Long nau yet i no gat pats long wokim nupela bris, bikos pats bilong wokim kain bris olsem bai kam long ovasis tasol.

Nau yet Aumia bris i slip krungut i stap bihain long bikipela ren na tait-wara long mun Mas 2015 i karim ol bikipela diwai na go bamim bris na krungutim ol pos na tu ain long bris na mekim em go bagarap, Nau yet ol kar na trak i yusim tasol wanpela bai-pas long ran i go kam bikos i gat birua o bagarap i stap yet long dispela longpela Aumia bris.

Madang Provinsel Woks Menesa, Ferdinand Wakeri i tokaut long dispela insait long wanpela miting las wik wantaim bikipela divelopa bilong Ramu

Mista Wakeri i tokaut tu olsem insait long las 20-pela kris-mas i no bin gat ol bikipela wok sekim i kamap long ol bris nau i stap long Madang-Ramu Haiwe, na planti long ol dispela bris em kondisen bilong ol i go bagarap na i mas gat senis i kamap long ol.

Em i tok em i wanbel long Presiden bilong Ramu NiCo Menesmen (MCC, Wang Jicheng long miting, husat i tokaut olsem planti ol bris long Madang-Ramu haiwe i no gutpela tumas bikos planti bilong ol i go olupela pinis.

Mista Wakeri i tok olsem ol lain enjinia bilong em long Woks i wokim wanpela rekomendesen pinis i go long Woks Dipatmen hetkwata long Mosbi tasol i no kisim wanpela gutpela bekim yet.

Presiden bilon Ramu NiCo, Mista Wang long miting las wik askim Madang provinsal Woks menesa long toktok wantaim ol bos bilong en na askim Gavman long wokim kamap nupela bris long Madang-Ramu Haiwe.

138 sumatin i no mekim Riten Ekspresen eksem

Esther Bralyn Wani i raitim

OLSEM 138 Gret 10 sumatin long Holy Spirit Hai Skul long Bogia i no bin sidaun long Riten Ekspresen eksem bilong ol long las wik Fonde taim pait i kamap long skul.

Dispela em bihain long taim haus slip bilong ol mangi i bin paia long Sarere 24 Me long dispela yia.

Pait i bin stat taim wanpela mangi Manam i bin go long haus slip bilong ol meri na holim wanpela meri Mikarew long meinlen long Madang. Dispela i mekim ol mangi long Mekarew i belhat na ol i tromoi ston long haus slip bilong ol mangi long Manam.

Ol polis, ol bikman bilong edukesen na ol lida long komyuniti i toktok long tupela grup sumatin long stretim hevi na paia i kirap long haus slip. Olgeta samting bilong ol sumatin i paia na paia i bagarapim bilding stret.

Tasol, ol polis i wok yet long painim aut husat i wokim paia na kukim haus slip. Tumoro Fraide bai ol i pinisim wok painim aut bilong ol.

Katolik Edukesen Seketeri, Bruno Tulemanil i tok, "Long dispela ol i bin saspensim skul inap long pablik holide long las wik Mande ol bikman i bungim olgeta papamama bilong ol sumatin na ol i toktok na wanbel.

Mista Tulemanil i tok ol i skelim buai namel long olgeta klen olsem sain bilong bel isi. Dispela i mekim na ol sumatin i go bek long skul long las wik Tunde.

Em i tok i gat olsem 290 Gret 10 sumatin na 158 sumatin tasol i bin sidaun long eksem. Ol 138 sumatin i no bin kam sidaun long Riten Ekspresen eksem bilong ol.

Mista Tulemanil i tok ol Gret 10 tasol i skul nau long wanem ol i no gat inap ples long slip na taim eksem bilong ol i pinis bai ol Gret 9 i statim skul gen.

Ol i makim wan wan ol bikipela ples we ol tisa bai redim skul wok bilong ol Gret 9 sumatin na karim i go na givim ol na ol i ken mekim taim ol i stap long haus.

Mista Tulemanil i tok hevi bilong etnik o wan pisin pait, kalt na pren pasin namel long ol manmeri i save kamapim ol kain pait olsem.

Em i tok ol i gat bikipela wari nau em long mekim nupela haus slip bilong ol sumatin. Em i tok narapela wari olsem edministresen i save putim ol sumatin long slip wantaim ol wantok o wanpela klen yet, ol i no save miiks na slip long haus slip.



Nationwide Microbenk opisa Jeremia Ruado wantaim wanwok bilong em Georgina i helpim liklik Songa Akum long opim MiPikinini Seavings akaun. Ol Maikrobenk opisa i karimaut ol awenes long ol ples long Madang provins long skulim ol pikinini na givim ol edvais long sevim mani taim ol liklik yet na long redim ol long lukautim ol yet gut long bihain taim. Lukim ful stori long neks wik.

Poto: James Kila

REGISTER ACTIVATE TICKETS!



Download and Activate the BSP Mobile Banking App for your chance to share in the 2015 Pacific Games Ticket Giveaway!




20x Family Packs
(4x tickets)
General Admission.

1x Family Pack
(4x tickets)
Major Giveaway for Sport or Venue Package.

* Only successful Mobile Banking App activation will be eligible.

1. Register for Mobile Banking
2. Download App
3. Activate **NOW**

DOWNLOAD NOW



320 1212 / 7030 1212 - 24/7

servicebsp@bsp.com.pg

www.bsp.com.pg



K15m hausing invesmen long Westen

TUPELA invesmen bilong hausing i kamap aninit long Komyuniti Main Kontinuesen Agrimen Tras long mani mak bilong K15.8 milien long Kepitol taun bilong Westen, Kiunga.

Ok Tedi Developmen Faundes (OTDF) opis long K 8.53 milien na ol haus bilong wok manmeri long K6.84 milien.

Dispela em tupela bilong 8-pela invesmen we CMCA Tras Fan i investmen long ol pipel bilong Westen na Papua Niugini.

OTDF opis i gat 52 wok stesen na 15-pela opis. Na hausing estet

i gat 7-pela tri bet rum haus na 12-pela tu bet rum yunit.

Ol arapela invesmen aninit long CMCA Tras Fan em tupela tuwin ota balus, tripela sip na Kasawari Hotel we wok bai kamap klostu taim.

Gavana bilong Westen Provins Ati Wabiro na Deputy Sif Eksektiv Opisa bilong Ok Tedi Maining na Jenerel Menesa bilong ol wokman Musej Werror i opim OTDF opis na hausing estet long Jun 12 long Kiunga.

Mista Werror i tokim moa long 500 pipel bilong CMCA komyuniti

na ol delegesen bilong provinsal gavman na opisas bilong OTDF olsem ol winmani bilong OK Tedi mani em bilong ol pipel na CMCA na OTDF bai go pas na givim ol sevis i go long ol pipel bilong Westen provins.

Mista Werror i singaut long ol pipel long Westen long sapatim ol projek we OTDF na CMCA i wokim long eria bilong ol.

Ol lida long Westen provinsi singaut long ol pipel long i mas i gat gutpela tingting na no ken bagarapim ol sevis na i mas lukautim gut long olgeta pipel bai kisim sevis.

Nupela Hai Komisina bilong Fiji hia long PNG

PRESIDEN bilong Fiji, Ratu Epeli Nailatikau, i makim H.E. Coomodore (Retrd) Esala Teleni, long kamap nupela Hai Komisina bilong Fiji husat bai stap long Papua Niugini long makim maus bilong ol pipel bilong Fiji.

Teleni i givim pas i go long Gavana Jeneral, Gren Sif Sir Michael Ogio, long Tunde 16 Jun, 2015 olsem em i kisim dispela ples.

Long wankain taim, Teleni i tok, em i gat bikpela amamas long tokim Sir Michael Ogio, Gavman na ol pipel bilong PNG olsem, Fiji i salim tok halo bilong em i kam long PNG long wanem, PNG i gat gutpela pasin na lukluk long ol gutpela wok bai kamap long bihain taim.

"Fiji i gat bikpela amamas tu long gavman na ol pipel bilong

PNG long yupela i gat gutpela luksave na sapat long taim mipela i go insait long bikpela taim no gut long kisim tru demokretik gavman we mipela i gat nau," Teleni i tok.

"Yumi i save bungim wankain hevi long stretim na i wok long painim gut taim long stap wantaim bel isi na mi tok tenkyu long sapat bilong yupela olgeta ol Melanisen brata."

Em i tok moa olsem, "Mi lukluk i go pas long wok klostu wantaim gavman bilong PNG long kamapim gut pren namel wantaim Fiji na PNG."

Sir Michael i tok, "long makim maus bilong Gavman na pipel bilong PNG, mi tok tenkyu long kam bilong yu PNG na long Gavman Haus."

"PNG na Fiji i kamapim dispela

luksave long taim PNG i kisim indipendens long 1975, tasol i gat luksave i stap pinis pastaim, long taim bipo misineri, tisa na ol dokta bilong Fiji i kam long sevim PNG we 100 yia na moa i go pinis," Sir Michael i tok.

"Mi ting olsem mipela bai stap klostu na wok bung wantaim long kamapim tupela kantri na pasifik rijen tu."

Em i tok moa olsem em i lukluk i go pas long Fiji bai kam stap long Pasifik Gem long Julai na tu long namba 46 Pasifi Ailan bung lon Septemba, 2015.

"Gavman bilong PNG i lukluk i go pas long wok bung wantaim yu long bungim wanem kain bel hangre yu i gat long mekim long taim yu bai stap wantaim yumi," Sir Michael i tok.



Government House Photo

H.E Commodore (Retrd) Esal Teleni long han sut, i givim pas i go long Gavana Jeneral Sir Michael Ogio.

Seketeri bilong Edukesen i tingting long mekim ol tisa amamas

Esther Bralyn Wani i raitim

NUPELA Edukesen Seketeri bilong Edukesen, Dokta Uke Kombra i amamas long dispela sans na salens gavman i givim long em.

Em i tok aut long ol rot long stretim edukesen sistem long las wik Trinde.

Em i tok tenkyu long gavman long bilip long em na givim dispela wok olsem Seketeri bilong Edukesen.

"Mi gat wok long mekim long taim na bihain wok bilong gavman long karim aut edukesen long olgeta pipel," Dokta Uke i tok.

Long dispela, gavman i bin givim K1.1 bilien long karim aut ol sevis bilong edukesen na K600 milien i bin go long Teseri Fri Fi (TFF) na ol narapela mani ol i yusim long edministresen na ol narapela wok.


Dokta Uke i makim 4-pela poin we em i laik luksave long en taim em i stap long opis. Ol dispela em, luksave long kain kain rot long mekim ol tisa na pablik seven amamas long welfe bilong ol olsem peirol.

"Mipela no inap baim kar o kain ol bikpela samting tasol mipela mas luksave olsem ol tisa i kisim entaitelmen bilong ol long taim stret," Dokta Kombra i tok.

Em i tok moa long kamapim gutpela gavanens na akauntabiliti long olgeta level, givim strong long ol provins na distrik na lukluk gut long ol sistem na ol proses long modenaisim na sevim kos.

Long wankain taim, Kasi Kaikoti i kamap nupela Dairekta Jenerel bilong Laibreri na Akaivs.

Lokol bisnis man bai helpim long kamapim oil



Mista Tony Lumasei- TPM Steseneri Menesa.

OL pipel husat i save wokim ol Virgin Kokonat Oil (VCO) i wanbel long wangepela bisnis man long ples bai helpim ol long wokim VCO bisnis bilong ol na em i sainim agrimen wantaim ol.

TPM Steseneri bilong Lumasei famili i wanbel na sainim wangepela MOU long helpim wok bilong kamapim Virgin long helpim long salim ol oil bilong ol. Insait long MOU, TPM steselong ol Virgin Kokonat Oil na ol botol i go long ol fama bilong oil.

Menesa bilong TPM Steseneri Tony Lumasei

i tok long taim bilong sainim MOU olsem ol lain i wokim oil i mas wokim planti long ol i ken strongim bisnis na long helpim ol yet. VCO em i helti long kukim kaikai long wanem em i kamap long ol kokonat we i no gat marasin i mekim ol long gro. Dispela oil i gat planti wok bilong helpim helt olsem long lusim skin na stopim ol kainkain sik long skin.

Wol Visen Komyuniti Ikonmik Mobilaisesen (CEM) Projek long Bogenvil wantaim mani i kam long Nu Silan Gav-

man i helpim dispela Virgin Kokonat Oil projek.

Em bilong helpim ol long kirap long helpim ol yet long kamapim gutpela sindaun bilong ol. Dispela projek i helpim tu long sapatim ol kakao na kakaruk fama long planti hap bilong Sentral Bogenvil.

TPM Steseneri i wanbel tu long em bai oda long ol botol i kam long Lae long helpim ol fama long ol i no ken sot long ol samting bilong salim oil bilong ol bihain long Wol Visen Bogenvil CEM Projek i pinis.

NMSA i strong long rausim korapsen

NESENEL Maritim Sefti Atoriti (NMSA) i laik rausim pasin korapsen long wok ples bilong en.

OL NMSA wokman na meri i bin wokabaut wantaim namba 9 Sir Anthony Siagru Wokabaut Agens Korapsen long Pot Mosbi long Sarere bilong soim dispela strong-pela tingting, NMSA i gat long no ken larim wanpela kain pasin korapsen i stap insait long ples bilong wok bilong en. I gat 12-pela lain bilong NMSA i bin wokabaut wantaim ol Yut Koalisen Agens Korapsen stat long Jack Pidik Park i go long Boroko, Murray Barracks raunabaut na i go bek long Pak long 5-Mail.

NMSA Jeneral Menesa na Sif Eksekutiv Opisa, Paul Unas i sapotim tru dispela samting na em i tok olsem NMSA wantaim ol woklain bilong en i amamas long stap insait long dispela gutpela pasin.

Dispela wokabaut em i wanpela komitmen bilong Atoriti long helpim olgeta komyuniti aninit long wok bilong en long givim Komyuniti Sevis.

Mista Unas i tok, "Korapsen em i bikpela hevi we i save kisim olgeta lain na sapot bilong mipela long dispela yia i soim sapot na edvokasi bilong NMSA long tok no gat long pasin korapsen.

Em i go wantaim tu 5-yia koporet strateji bilong Atoriti long strongim gutpela gavanens na transparensi. NMSA i lukim olsem i gat wok bilong daunim korapsen na wanem samting i save kamap long bagarapim bisnis komyuniti; olsem na yumi mas mekim olgeta rot long pasin korapsen long dispela pasin no no gut."

NMSA i sapotim tu Kila Kila Sekenderi Skul wantaim 10-pela sumatin na 2-pela tis long wokabaut wantaim ol.

Mista Unas i mekim luk-save na tok tenkyu i go long skul menesmen na ol sumatin long tok orait long wokabaut wantaim NMSA.

"Em i gutpela samting long kisim ol pikinini long kain taim we ol i stap yangpela yet long edukesen bilong ol na ol bai kisim pasin bilong daunim korapsen," em i tok.



Oi lain bilong NMSA bihain long wokabaut egens Egens Korapsen long Jack Pidik Pak long Sarere. Poto na stori i kam long NMSA PR

PNG i redi long selebretim Wol Refugi De

PAPUA Niugini Imaigresen na Sitisensip Atoriti (ICSA), Intanesenel Ogenaisesen bilong Maigresen (IOM) na ol Yunaitet Nesen (UN) ogenaisesen bai bung long luksave long Wol Refugi De long dispela Sarere, 20 Jun 2015. De bai open long ol pablik long go raun na lukim ol selebresen namel long 10a.m inap 3p.m long Jack Pidik Pak long Pot Mosbi. *Ol Refuji i nidim helpim han bilong mipela* em i het tok bilong Wol Refugi De.

Ekting Sif Maigresen Opisa, Es-

ther Gaegaming i tok, "Wol Refugi De i bikpela samting long mipela. Em i sans bilong mipela long rispektim dispela luksave, na pasin bilong ol refuji long sanap strong long PNG na tu ol narapela long wol.

Dispela de em bilong amamas long mekim nupela ol hatwok long sapotim ol taim ol i redi long bildim gen ol laip bilong ol na givim long gutpela sindaun bilong kantri".

"Long olgeta hap long wol, mipela i lukim planti refuji na ol

pipel i no gat hap long stap bikos long pait, kros namel long ol pipel, na mekim no gut long ol.

Long wanem, em i gutpela long selebretim Wol Refuji De long PNG long dispela yia.

Dispela em i pablik iven long mekim awenes long hatpela laip bilong ol refuji tasol long luksave long ol sosal, kalsarel, iekonomik na ol narapela kontribusen ol refuji i mekim long kantri," UN Residen Kodineta, Roy Trivedy i tok.

Insait long spirit bilong dispela

het tok, wok bilong IOM insait long PNG na PNG ICSA i ogenaisim wanpela narapela kain tingting ol i kolim "Living Libreri" we i bai kisim ol reguji, gavman bilong PNG, sivil sosaiti, ol intanesenel patna, midia na pablik long bungim ol refuji na soim amamas long ol strongpela pasin bilong ol taim ol i fosim ol long lusim haus bilong ol long ol pait.

Dispela program bai stat long 10 klok moning wantaim planti skul long NCD i harim toktok bilong ol

man i makim gavman bilong PNG, UN, na ol narapela stekholda.

Long pinisim dispela Open De long 2p.m, PNG Refuji Embeseda na intanesenel atis o singa, Anslom wantaim Radaaz Ben bai singsing fri inap 3p.m.


Em bai sensing long Wol Primia long nupela song bilong em, 'Refugees Need the World's Helping Hand' we bai kamap long rege albam na bai go aut long intanesenel long dispela yia.

Gavman bilong Papua New Guinea itok orait pinis long ol refugee iken stap wantaim yumi. Yumi mas larim ol long kisim wok na halivim yumi long developim kantri bilong yumi.

REFUGEES LAIKIM HALIVIM BILONG YUMI

PNG ken halivim ol refugees long painim gutpela sindaun wankain olsem ol narapela kantri imekim.

Toksave ikam long Gavman bilong Papua New Guinea.



Australia i sapotim wokabaut agens korapsen

OL wok lain long Australian Hai Komisen long Mosbi i joinim wokabaut agens korapsen long Sande, 14 Jun.

Australia em i longpela taim sapota we i sanap baksait long Trensparensi Intanesenel PNG (TIPNG) insait long 'Strongim Pipol Strongim Nesen Program.'

Australia i toktok long strongim dispela enti-korapsen tingting ol Australian Federal Polis (AFP) na Royel Papua Niugini Konstabuleri (RPNGC) i wok patna wantaim long daunim ol bikhet na kyorap pasin long PNG.

Em bai strongim ol polis fos long wok strong insait long PNG long stopim korapsen, na tu strongim ol sivil sosaiti ogenaisesen olsem TIPNG.

Australian Hai Komisina i kam lonh PNG, Deborah Stokes, i tok, "korapsen em i wanpela bikpela wari insait long olgeta hap long wol."

"Korapsen i slip insait long gro bilong ikonomi na mekim developmen i no kamap kwik taim, na long dispela as tasol, namba bilong tarangu lain i kamap bikpela," Stokes i tok.

Em i tok moa olsem, korapsen i daunim ol risos bilong givim ol namba wan sevis na ol tarangu lain husat i stap long ples na siti tu i kisim bikpela bagarap.

"Australia Gavman bai no inap larim ol pipel long paulim mani na mekim korapsen pasin, na em bai strong long sapotim dispela PNG Nesenel Enti-Korapsen Streteji polisi bilong yia 2010 i go long 2025," Stokes i tok.

Australia i givim pinis K10.6 milien long TIPNG long yia 2011, insait long wokabaut fan raising bilong helpim em long wokim wok long stopim korapsen pasin.

AFP i putim plesmen program

Philemon Tame i raitim

PAPUA Niugini-Australian Polising Patnasip (PNG-APP) Mekim Senis Plesmen Program em i tingting bilong putim ol wok man na wok meri bilong Royel Papua Niugini Konstabuleri (RPNGC) insait long Australia polising ejensi long stap wan mun bilong kisim save na ekspiriens long narapela rot bilong bihainim lo.

Namba wan program em ol i statim long Oktoba 2013, na long dispela taim, 50 na moa polis manmeri long RPNGC i joinim Australian Federal Polis (AFP), ACT Polis, Noten Teritori Polis, na Kwinslen Polis.

PNG-APP i kam bung wantaim na putim RPNGC polis manmeri husat i save wok wantaim long dispela mekim senis program na holim ritensen program insait long tupela de.

Hetman bilong AFP diploimen long PNG na Asisten Komisina, Alan Scott, i tok, "dispela ritensen program em i bilong painim aut sampela wankain samt-ing we RPNGC na AFP i bungim long taim bilong wok na lainim sampela nupela samt-ing i kamap."

"Ol PNG Polis Opis bai yusim ol save na ekspiriens ol i kisim long plesmen program na ol bai kamap namba wan wokman bilong mekim senis" Scott i tok.

Em i tok moa olsem, plesmen program em i rot we i save opim ai bilong ol polis man na polis meri long ol bai



Asisten Komisina bilong AFP, Alan Scott, i sanap long name, husat i opim tupela de konfrens long Boroko AFP konfrens rum. Piksa: Rozalia Dala

gat gutpela tingting na pasin long sapotim RPNGC long winim mak bilong en. PNG gavman i givim bikpela sapot na olgeta memba bilong RPNGC i save pinis long dispela plesmen program i kamap.



Papua Niugini NESENEL AIDENTITI PROJEK



Oi emu namo totona, Nesinol ID kadi oi abia



- ▶ Durua namona abia gorere neganai bona muramura abia totona.
- ▶ Gavamani ese oi emu hosipele davana do ia hoia bona gorere hanamoa dalana do ia hoia danu

"Oi rejista hari bona oi noho lalonai"

Nesenal Plening Dipatment ese hereva ia mailaia



Heltkea



Olgeta trening intitusen bai stap aninit long Dipatmen bilong Edukesen

Esther Bralyn Wani i raitim

DIPATMEN bilong Edukesen aninit long Dipatmen bilong Haia Edukesen, Sains na Teknoloji bai i lukautim olgeta trening institut insait long edukesen sekta bihain long Nesenel Eksekutiv Kaunsel (NEC) i mekim dispela disisen las wik. Edukesen Minista, Nick Kuman i tok, "NEC i mekim dispela disisen long taim nupela Ekt bilong Dipatmen bilong Haia Edukesen Sains na Teknoloji (DoHEST) i kamap long tupela wik pinis". "Long dispela Ekt, DoHEST bai i karim olgeta wok bilong ol teknikel trening intitusen na olgeta kolis insait long kantri, olsem salari bilong ol tisa na gutpela sidaun bilong ol tisa," Minista Kuman i tok. Minista Kuman i tok taim dispela wok i go long Haia Edukesen ol

i no inap long mekim ol senis olsem Dipatmen bilong Edukesen, Nesenel Edukesen Ekt, Sevis Komisn Ekt bilong ol tisa, na long dispela ol bai i lukautim yet ol stended na welfe bilong ol tisa na karikulum. "Mipela i mekim dispela wok long wanem em i hatpela tingting we Kabinet i mekim disisen long givim bek ol trening intitusen long ol wan wan dipatmen, olsem Edukesen Dipatmen bai mipela kisim ol kolis bek," Minista i tok. NEC i mekim disisen olsem olgeta tenikel trening kolis, ol vokesenel skul na ol tisa kolis insait long kantri bai stap wantaim Dipatmen bilong Edukesen. Long dispela, em i wankain disisen long olgeta narapela trening institut we ol narapela dipatmen i ranim olsem Egrikalsa, Fiseris, Forestri na Helt

long ol narapela gavman ejensi. Long wankain taim, NEC i kamapim wanpela Tasfos we olgeta het bilong dipatmen bilong olgeta ejensi wantaim Dipatmen bilong Edukesen na Sif Seketeri bai i stap siaman long dispela tasfos. Minista Kuman i tok, "Tasfos bai i risponsibel long divelopim wanpela diteil polisi daireksen long kisim edukesen sistem i go long narapela 40 yia. Em i tok dispela tasfos bai kamap wantaim bluprin o plen bilong gavman long mekim wanpela disisen we bai ol i senisim edukesen sistem bilong mipela long kantri. Dispela bai inapim ol teseri institusen i stap aninit long ol digri program olsem ol teknikel skul, ol vokesenel skul, na ol egrikalsa kolis na ol skul bilong ol nes tu.

Minista i kros long het tisa bagarapim skul meri

MINISTA bilong Edukesen, Nick Kuman long las wik i tok strong tru egensim pasin we tupela bikpela opisa bilong edukesen long Maprik, Is Sepik Provins i mekim long wanpela liklik skul meri.




Mista Nick Kuman, Minista bilong Edukesen.

Dispela pasin reip o bagarapim meri i bin kamap long wanpela gel em i gat 14 krismas na ol lain i mekim em ol lain we i gat wok long lukautim dispela pikinini. Dispela tupela man nau i stap long kalabus long Wewak long wet long kot bilong ol. Mista Kuman i tok em i laikim kot i mas givim mekim save long tupela man taim ol i painimaut olsem dispela toktok em i tru. "Mi sem long dispela pasin i kamap we hetmasta na senia standet opisa i mekim. Em i olsem ol i bilas long wok tisa na olgeta man tisa," Mista Kuman i tok. Minista i mekim dispela

toktok bihain long em i ritim wanpela niuspepa ripot long las wik na em i kisim bikpela bel hevi na wari long dispela. "Mi kirap no gut long dispela kain ripot bilong ol tisa i mekim long bagarapim ol sumatin na mi no inap long westim taim long givim mekim save long ol sapos wankain ripot i kamap na i kam long opis bilong mi," Minista Kuman i tok. "Dispela em i no namba wan taim long wanpela sumatin i kisim

bagarap olsem reip na we ol tisa bilong em yet i bagarapim em. Kain pasin i save kamap sampela taim na mi bilip olsem i gat planti ol i no save tokaut long ol," Mista Kuman i tok. Minista Kuman i tok, em yet olsem Minista bilong Edukesen, i laikim ol tisa na ol narapela lain husat i lukautim ol skul long rispekim wok bilong ol yet. Na bilip we ol i holim wantaim posisen bilong ol we ol sumatin, papa mama na ol komyu-

niti na gavman bai gat bilip long ol. Em i tok dispela gavman i gat strongpela tingting long kamapim wanpela kantri i gat gutpela sindaun olsem na ol i putim bikpela mani go long edukesen na ol i laikim ol tisa i mas soim komitmen long ol wan wan skul bilong ol na kantri tru. Em i tok moa olsem ol tisa i mas oltaim holim pasin bilong self disiplin o stretpela pasin. Em i bin toktok long palamen tu long taim bilong askim na bekim long pasin bilong ol sumatin i save pait na lo na oda hevi insait long ol skul we ol pikinini o sumatin i save bagarapim ol haus na samting long skul i westim bikpela mani na tu i stopim taim bilong lainim samting. "Taim mi stap Minista bilong Edukesen, mi no inap tru long larim wanpela kain pasin bilong brukim lo i kamap long ol tisa," Minista Kuman i tok.



What it means to be Papua New Guinean

"Our home is one of the most unique countries on earth.

We all have a part to play to make PNG the greatest country on earth."

Let us embrace our shared values as we build the nation we want - together!



"PNG... EM MI YAH!"

National Strategy for Responsible Sustainable Development

www.PNGStaRS.org • Department of National Planning and Monitoring

© David Kirkland

WHO na Ripablik bilong Korea bung long rausim sik MERS-CoV

BIHAINIM bikpela sik Midel Is Respiratori Sindrom koronavirus (MERS-CoV), we i bin kamap long Ripablik bilong Korea, Wol Helt Ogenaisesen wantaim Ripablik bilong Korea Ministri bilong Helt na Welfe i wokim wanpela bung misin i go long Ripablik bilong Korea.

MERS-CoV em sik ol i save kolim tu long 'camel flu' na em i wanpela kain sik kus we i kamap long Saudi Arabia long Midel Is long yia 2012. Long Jun 2015 MERS-CoV i kisim moa long 20 kantri olsem Saudi Arabia, Jordan, Qatar, Isip, Yunaitet Arab Emirets, Kuwait, Turkey, Oman, Algeria, Bangladesh, Austria Yunaitet Kingdom, Saut Korea, Yunaitet Stests, na Bikples Saina na tu long Indonesia tasol ol i no painim tru long strongim tok.

Dispela wok misin i kamap bihain long wanpela konsaltesen namel long Wol Helt Ogenaisesen na gavman bilong Ripablik bilong Korea, bihain long ol dokta i painim olsem 150 lain i bin kisim dispela sik na 19 i dai na tu moa long 2300 em ol i putim ol long kwarentin o banis we ol bai sekim ol long binatang. Dispela namba bilong ol lain i kisim sik long Saut Korea i bikpela tru wankain olsem long Saudi Arabia.



Ol saveman dokta i traिम long stadi long laip bilong binatang olsem bai ol i ken traिम long stopim long Saut Korea.

Wanpela dokta i bin painim binatang bilong dispela sik namba wan taim insait long lang o win bek bilong wanpela sikman long Saudi Arabia long 2012. Dokta Mohamed Zaki i luksave long dispela na bihain 24 Septemba 2012 em i bin autim wok painimaut bilong en.

WHO tim bai go wantaim lidasip bilong Asisten Dairekta-Jeneral bilong Helt Sekyuriti, Dokta Keiji Fukuda. Insait long tim bilong ol dokta bai gat ol saveman bilong luksave long ol binatang na we bilong kontrolim na tu ol pablik helt opisa husat i bin wok long ol nara-

pela taim long MERS-CoV insait long Midel Is. Bikpela tingting bilong dispela join misin em long kisim sampela moa save long wanem samting i wok long kamap long Ripablik bilong Korea long dispela binatang

bilong sik MERS-CoV i kamap na go olsem wanem. Dispela tim bai luksave tu long wanem kain wok pablik helt i mekim long stretim rot bilong daunim dispela sik.

Long taim dispela sik i bin kamap, WHO i bin wok klostu wantaim Ministri bilong Helt na Welfe na wantaim Korea Senta bilong Disis Kontrol na Stopim Sik long wanem kain we bilong pait wantaim dispela sik. WHO i amamas long wok bung bilong Gavman long autim ol toksave bilong wanem samting i kamap pinis.

Wantaim ol toksave nau i stap, WHO i skelim hevi bilong dispela olsem, i no gat mak long kisim tingting olsem binatang i kalap long wanpela man i go long narapela insait long komyniti na i no gat sain olsem binatang i ken raun long win. Ol i ting olsem dispela binatang em ol blakbokis i wok long karim raun.

MERS-CoV em i wanpela nupela kain sik olsem kus long nek we i givim hevi long lang o win beg tasol i no gat marasin bilong en na em i wok long kilim ol man i dai. I no gat klia save tumas long kamap bilong dispela sik yet na ol saveman dokta bilong Wol Helt Ogenaisesen i wok long mekim wok yet long painim aut moa.

Red Cross bringim wara long ol lain kisim bagarap

TRIPLELA mun bihain long strongpela win, Saiklon Pam i bagarapim ol pipel bilong Vanuatu, nau strongpela taim bilong san i kamap olsem na ol woklain bilong Intenesenel Federesen bilong Red Cross na Red Crescent Sosaiti helpim i wok strong long bringim seif wara long ol komyniti.

Moa long 200,000 pipel insait long 5-pela Pasifik kantri i bin kisim bagarap long taim Saiklon Pam i kisim hap bilong ol long Mas 13 na brukim ol haus na ol wara tenk na ol narapela ples bilong kisim gutpela wara. Vanuatu i bin kisim moa bagarap winim ol narapela, tasol ol kantri olsem Tu-

valu, Kiribati, Solomon Ailan na Papua Niugini tu i bin kisim sampela bikpela bagarap.

"Ol pipel bilong ol liklik ailan i save long lukautim ol yet long taim wara i sot, tasol ol bagarap i kamap long Saiklon Pam bai mekim hat moa long ol i stap strong long dispela taim," Aurelia Balpe, IFRC Het ov Deligesen long Pasifik i tok.

"Taim yumi kam namel tru long drai sisen, yumi mas sekim gut ol komyniti olsem ol i gat gutpela wara we i stap seif na klin," em i tok.

Red Cross i bin helpim 36,000 wantaim ol imejensi sapot insait long tripela mun na bihain gen bai

helpim narapela 33,000 pipel moa. Ol bai lukluk long wara na senitesen na tu long stretim ol ketsmen haus bilong renwara wantaim wara tenk. Em bilong promotim gutpela pasin bilong haijin long passim rot bilong ol kain kain sik i kamap long wara i doti.

Insait long tupela yia Red Cross bai helpim tu long givim ol samting bilong wokim na stretim gen ol haus we Saiklon i bin brukim na bagarapim. Ol komyniti bai kisim moa trening long sanap strong long banisim ol yet long taim bilong hevi na bagarap, wantaim helt edukesen, haijin promosen na ol fes eid trening.

Nupela Global Fan Gren long strongim HIV wok

GLOBAL Fan, bikpela mani gren dona bilong helpim wok bilong sik HIV long kantri i kam gut gen long sainim wanpela agrimen long go het yet long sapotim wok bilong HIV long PNG wantaim US\$14.2 milien (PGK43 milien).

Lady Roslyn Morauta, Siameri bilong Papua Niugini Kantri Kodinesen Mekenisim (CCM) bilong Global Fan i tok olsem Global Fan i wanbel long givim yet mani long helpim ol helt program long Papua Niugini.

Long taim ol i sanim agrimen long Nesenel Dipatmen bilon gHelt, Lady Morauta i tok tenkyu long Global Fan long gutpela sapot bilong em long Papua Niugini i go yet. Ol mani we Global Fan i save lukautim em i kam long planti kantri, planti bilong ol i gat opis long Pot Mosbi tu na ol i gat man na meri i makim ol long dispela taim bilong sainim agrimen. Ol kantri olsem Australia na US Gavman na Yuropien Yunien em ol bikpela dona long dispela fan.

Nupela HIV gren nau bai lukluk long tritmen na we bilong stopim ol lain long kisim sik, em ol pipel husat i stap long rot bilong kisim sik stret olsem ol lain husat i save yusim pasin pamuk olsem wok mani, ol man husat i save slip wantaim narapela man yet na ol man husat i gat tingting na pilim olsem ol i meri na ol meri husat i tingting na pilim olsem ol i man (transgender).

Moa wok bai go long lukluk long ol meri i gat bel, TB siklain na ol pipel husat i kamap long haus sik wantaim wanpela sik i save kamap long taim man na meri slip wantaim.

Ol ripot i soim olsem i gat samting olsem 30,000 pipel nau i stap wantaim binatang bilong HIV long Papua Niugini.

Dispela gren i bungim ol lain husat inap long kisim dispela sik na ol lotu

lain, praiwet sekta na gavman ejensi. Namba wan lain long kisim bikpela hap bilong dispela gren aninit long Nesenel Dipatmen bilong Helt em Oil Search Faundesen husat bai wok wantaim Anglicare, Katolik HIV/AIDS Sevis, Save the Children, Hope WorldWide, Iगत Hope, na Institiut bilong Medikal Risetes.

Luca Occhini, Saut Is Esia na Pasifik Rijonal Menesa bilong Gobol Fan i tok: "Stigma na diskriminesen o pasin bilong lukdaun long ol narapela i ken kamap olsem strongpela banis long stopim pait long daunim HIV binatang.

Dispela gren bai helpim long brukim dispela kain banis."

Strongpela ol wok patnasip bai mekim wok bilong nupela greni kamap gut.

"Wok bung namel long Nesenel na Provinsal Gavman, non-gavman ogenaisesen na ol narapela stekholda, long yusim gut ol save bilong wok we ol praiwet na pablik sekta i gat na ekspiriens bilong ol long givim gutpela sevis bilong HIV long PNG," Mis Copus-Campbell, bosmeri bilong Oil Search Faundesen i tok.

Deputi Het ov Misin bilong Yunaitet Stets Gavman, Melanie Higgins i tok sapos dispela wok i kamap gut em bai rausim pasin bilong lukdaun long ol lain i gat sik HIV na ol lain husat i gat pasin we ol inap kisim sik isi."

Patnasip bilong Australia bai sapotim wok bilong malaria na long gutpela menesmen bilong TB na HIV.

"Mipela i amamas long wok yet wantaim Global Fan long sevim laip wantaim pait egens long ol sik we yumi inap stopim." James Hall, Minista Kaunsela bilong Australia Hai Komisen i tok.

Yuropien Yunien (EU) i stat long sapotim Global Fan stat long 2002 yet.



Ol manmeri na pikinini long ples i redi long kisim ol saplai bilong ol.

Meri Iguruwe soim naispela luksave

James G. Kilai raitim

OL MERI bilong zon 2 long wod 17 bilong Usino Lokal Level Gavman (LLG) long Madang provins i soim naispela luksave stret long ol lain i go givim trening na tu, redim ol long opim nupela benk akaun.

Long las wik Trinde ol mama long ples Iguruwe husat i bin kisim trening bilong lukautim kakaruk na sastenabol living i kamap long en i amamas tru na givim ol presen olsem kakaruk na tu pato o go long ol lain trena.

Tupela trena bilong Ramu NiCo Komyuniti Afeas (CA) Dipatmen, Egrikalsa Seksen wantaim tupela opisa bilong Nationwide Microbank i kirap no gut taim ol mama i redim ol presen na givim



Fil ekstensen opisa bilong Ramu NiCo CA agrikalsa seksen Seth Win i kisim wanpela bikpela pato olsem presen long ol mama bilong zon 2 long ples Iguruwe long Usino LLG wod 17. Foto: James G. Kila

ol. Dispela ol presen em narakain stret. Ol trena na woklain bilong benk i

kisim ol laip kakaruk na pato i go long haus bilong ol.

Mi tu bin go wantaim ol lain opisa bilong Benk na tupela egrikalsa trena bi-

long Ramu NiCo CA dipatmen em, Samuel Masawa na Seth Win, na ol mama i amamas long mi olsem nius-man na givim mi wanpela bebi kakaruk.

Dispela meri kakaruk em namel sais stret na gutpela long mi lukautim liklik na bihain mi painim wanpela papa kakaruk, na tupela bai kamapim sampela moa ples kakaruk long mi lukautim.

Dispela kain naispela pasin bilong soim amamas na givim presen i stap long planti ples insait long PNG.

Tupela benk opisa bilong Nationwide Microbank tu i amamas stret long ol naispela presen em laip kakaruk ol i kisim long ol lain mama bilong Iguruwe.



Yut, Meri na Famili

Pastor Barbara Lunge

Kingdom bilong lait bai stap oltaim, oltaim

I GAT tupela kingdom i stap, wanpela em kingdom bilong tudak na narapela em kingdom bilong Lait.

Satan i save bosim kingdom bilong tudak na em i wok long kisim planti pipel husat i sakim tok bilong God. Buk Kamapim Tok Hait i tok long 20:5 'ol lain husat nem bilong ol i no stap long buk bilong laip bilong pikinini sipsip bai ol i tromoi ol i go insait long bikpela paia. Tasol ol dispela lain husat i harim tok bilong God na kisim Jisas Kraiss em ol i kamap nupela Kristen. Kamapim Tok Hait 20:14. Em ol husat i kamap memba bilong kingdom bilong lait we Jisas i bosim. Dispela kingdom em i Stap Oltaim Oltaim we ol pikinini man bilong God i laikim na bihainim ol lo i stap long baibel.

Ol kantri nau i kam anit long jas bilong God. Ol ikonik, politik, lotu, edukesenel, sosol sistem we ol i sanap antap long save bilong ol man em nau i wok long pundaun. Tasol nupela sistem we i mas sanap long Tok bilong God i mas sanap long tok bilong God olsem stia, as bilong laip, na ol pasin bilong en. Ol Kristen lida i mas kamaut long soim ol pasin bilong kingdom, we em i stretpela pasin na pasin i tru.

Tok bilong God long buk Kamapim Tok Hait 11:15 i tok, Kingdom bilong dispela graun i kamap kingdom bilong Bikpela na Kraiss bilong em, na em bai stap king oltaim, oltaim. Long buk Daniel yumi lukim stori olsem ol i giamanim em na tromoi em i go daun long haus bilong laion tasol God i kisim bek em. Olsem na king i tokaut olsem long Daniel sapta 6:26 olsem, 'olgeta hap bilong kingdom bilong mi, ol pipel i mas gat pret na rispek long God bikos em tasol em i God i stap laip oltaim na kingdom bilong em i no inap bagarap na em gavman bilong em bai ino inap pinis.

God Bikpela nau i wok long mekim wanpela senis long givim kingdom bilong em i go long ol Kristen. Daniel sapta 7:26-27, 'Tasol kot bai sindaun; na ol bai rausim pawa bilong en na bagarapim olgeta. Na bai olgeta kingdom anit long hevel bai ol i givim long ol santu pipel bilong Bikpela God antap. Olgeta lain long kingdom bilong em na olgeta lain husat i gat pawa long graun bai kam lotu long em. Olgeta pipel long Papua Niugini i mas tanim bek i go long God.

Insait long em yumi stap na kisim laip. **Toksave: Sapos yu i gat wari, tingting planti, yu mas ringim mi na bai mi helpim yu. Raitim pas long dispela adres na fon namba. Barbara Lunge, ROGIM, P.O. Box 3063, Boroko, NCD. PNG, o ring long 79638276 o salim email long: lungeb37@gmail.com**

Praim Minista bai opim bisnis ekspo bilong ol meri

PRAIM Minista, Peter O'Neill bai opim 10-pela de PNG Digidel Meri wokim Bisnis Ekspo long Julai 2 long Konstitusenel Pak long Pot Mosbi.

Ol PNG Wimen in Bisnis (PNGWIB) Faundesen bai kamap long wankain taim wantaim 2015 Pasifik Gems na ol i bilip olsem em bai bringim planti tausen pipel long siti na tu ol 5,000 visita lain bilong spot na ol pisa bilong ol long go.

PNGWIB Dairekta Janet Sape i tok, Mista O'Neill i soim tingting bilong gavman long givim luksave long ol PNG meri long bisnis na long Liklik i go Namel Sais Bisnis (SME) na tu ol meri husat i stap long infomol sekta.

"Dispela sapat i helpim o sapatim ol meri long sait bilon gwok mani o ikonik empawamen bilong ol meri. Na tu em i luksave long save na strong bilong ol meri long strongim ikonik bilong kantri long sapatim ol bikpela tingting bilong self-riaiens na long rausim pasin bilong stap rabis long ol komyuniti bilong yumi," em i tok.

Misis Sape i tok bilong redi long dispela kibung em 200 ol meri husat i gat bisnis bilong ol yet i rejista pinis long soim ol samting ol i gat. Rejistresen bai pas long Mande 22 Jun.

Ol kain bisnis olsem bilong ol



Ol meri long bisnis sindaun long harim tok bilong ekspo wantaim sponsa bilong Digidel.

meri i save wokim ol samting bilong bilas wantaim ol samting bilong yumi yet long ples, ol meri husat i save bringim mobail kit-sen sevis, wanpela penta na konstraksen na sivel ensinia kampani bai stap tu long dispela 10-pela de.

Ol profesenel meri husat nau i wok long praivet wok bai kam insai tu long ekspo long soim ol sevis bilong ol long maket long ol

narapela bisnis meri long lukim sapos ol bai nidim dispela sevis.

Ol NGO, ol kampani na asosiesen husat i save mekim wok bilong helpim ol meri bai gat sans long wokim ol awenes bilong ol.

Em bai promotim treid na komes bilong ol PNG meri long rijon, bikos ol meri grup bilong Solomon Ailan na Indonesia tu i tok ol i laik kam long dispela

taim.

I gat singaut i go long ol lokal Memba bilong Palamen tu long sapatim ol meri gat bisnis long ol ilektoret bilong ol long kam long dispela ekspo. Ol memba bilong Hailans na MOMASE rijon i soim olsem ol i gat tingting long sapatim ol meri long kamapim ol tumbuna singsing bilong ol wan wan provins bilong ol.

Ol Pot Mosbi skul i luksave long Wol Envairmen De

Skul long Pot Mosbi i bin mekim luksave long Wol Envairmen De long Jun 4 wantaim wanpela dibeit o tok resis na wanpela resis bilong raitim esei o stori bilong envairmen.

Luksave bilong Wol Envairmen de i bin pinis long Fraide wantaim wanpela bikpela kaikai long Visen Siti Dynasty restoren we Opis bilong Envairmen, Konsevesen na Proteksen Atoriti i bin sponsa long en na olgeta skul bilong Pot Mosbi husat i bin stap long ol dispela resis ii bin kamap.

Ol skul long Pot Mosbi i bin



Wina tim bilong Sen Charles Luwanga Sekenderi Skul.

holim tupela kain resis, wanpela long dibeit o resis long toktok na narapela long raitim esei o stori

bilong envairmen. Wanpela pikinini meri long Marianville Sekenderi skul, Leoshina Kariha i bin

kisim namba wan awod long raitim esei tasol em i no bin stap long kisim awod bilong em na tisa bilong em i kisim long nem bilong em.

Long dibeit namba wan skul long winim dibeit long gavman sait em Jubilee Katolik Sekenderi skul. Em i namba tri taim ol i winim dispela kain awod.

Na long oposisen sait em Sen Charles Luwanga Sekenderi Skul long Gerehu i bin kisim namba wan awod. Em i namba wan taim bilong Sen Charles Luwanga Sekederi long go insait long inta-skul dibeit tasol ol i soim gutpela kala.



Angliken Sios bilong PNG i gat nupela Bisop

LOTU Angliken i bin welkamim nupela Bisop em Pater Denny Bray Guga long Sande 24th Me, Pentekos de long St. Martin long Is Boroko.

Moa long 1,000 manmeri i bin bung long witnesim Pater Denny Bray i kisim blessing na kamap Bisop bilong Pot Mosbi Angliken Daiosis.

i gutpela long lukim olsem Pater Danny Bray i wok moa long 20 krismas olsem pater insait long siti na planti lain i luksave long wok ministri bilong em.

Taim em i stat wok long 1994 na em i wok wantaim planti peris insait long siti olsem Sen Martin long Is Boroka, Sen Mary long Gerehu, Holi Famili long Hohola na Sen John long daun taun. Na pastaim tasol em i kamap Bisop, em i bin saplen bilong Yunivesiti bilong PNG, Waigani.

Taim em i wok ministri insait long ol siti peris, em i kisim sampela posisen olsem As Dikon na Vika Jenerel insait long daiosis na nau yet em i siaman bilong PNGCC.

Long dispela ekspirians, yumi bilip em bai wok bung wantaim gavman, bisnis indastri, NGO na sios long soim wok stail bilong Jisas minsitri insait long siti.

Pasin bilong wok bung em tru kala bilong God na em tasol bai kamapim gutpela wok bung namel long gavman, NGO na ol sista Sios.

Tru, long kamap bisop insait long siti em i no isipela wok. Tasol yumi tenkim God olsem em i makim wanpela namel long yumi, husat bai karim hevi hevi bilong yumi pipel long stretim spirituel laip bilong yumi. Long dispela gutpela wok fil ekspirians bilong em, bai bringim spiritual yuniti long gutpela wok bilong God namel long pipel, sios, gavman na NGO.

Planti taim yumi harim olsem gavman patnasip i wok gut, tasol nogat. Gavman i lus fokas na i no luksave rot we sios i karim pen na hevi i.

I gutpela gavman na ol arapela stek olda i wok bung wantaim nupela Bisop Danny Bray long stretim ol hevi ol sios i bungim insait long siti.

Wanpela gutpela piksa em ol lain long Pivo na Sori (Kerema bus) i prisenim Bisop Danny long wanpela bikpela bilum i no gat kaikai long en.

Bekim bilong dispela min olsem, Bisop i mas pulmapim kaikai na karim i go bek na givim kaikai i go long ol pipel bilong Sori na Pivo wantaim spirituel kaikai.

Wankain olsem, nupela bisop i wok wantaim gavman, NGO na ol arapela kristen sios long pulmapim kaikai gut long bilum na givim kaikai long ol siti manmeri.

I no yumi tasol, no gat. i gat moa pipel i stap yet long siti olsem, Australia, USA, UK, Canada, Africa, India na planti moa. Em salens bilong yumi Angliken na nupela bisop nau i mas wok hat moa long mekim ol haus lotu i mas kamap intenesenel komyuniti.

Wantaim dispela yumi pre na hop nupela bisop bilong Angliken Diosis bilong siti bai wok bung wantaim ol poroman bilong em long kirapim bek na strongim siti misin.

Ol Katolik Edukesen ejensi seketeri na RI kodineta i bung

SAMTING olsem 45 Katolik Edukesen Eduketa na Kodineta, na Katolik Edukesen Seketeri bilong olgeta hap bilong kantri i bung long Mosbi long toktok long ol samting i karamapim ol ejensi skul bilong ol long dispela kantri.

Bung i kamap long Emaus Konprens Senta insait long eria bilong Don Bosco Teknolojikel skul long Taurama, Nesenel Kapitel Distrik, na i bin stat long dispela wik Mande na bai pinis tumora, Fraide.

Wanpela long ol samting we bung i luksave long en em long Pesenel Developmen Karikulum na ol samting we ol sumatin long PNG i no kisim bikos ol i no plen gut na wokim karikulum.

Ol i luksave tu olsem long dispela taim, Sios Edukesen Ejensi i wok long bungim sampela hevi

i stap.

Bung i lukim olsem Pesenel Developmen em eria bilong ol Daiosis Katolik Rilijes Edukesen Kodineta (DCREC) long stretim.

Bung i harim olsem rot long stretim ol hevi long dispela eria em long luksave long ol hevi na karimaut awenes wantaim ol papamama, ol komyuniti bung, ol tisa na jenerel pablik.

Bung i harim tu olsem ol velyu na vetyu (gutpela na stretpela pasin) long Edukesen i bikpela samting.

Bung i autim olsem jenerel as tingting bilong edukesen em long developim helti bodi, krietiv tingting, kisim save long kisim wok, developim strongpela na gutpela man/meri we i save kamapim gutpela pasin, na laspela em long developim spiritual awenes.

Bung i tok ol dispela i no gat Kristen as tingting long ol.

As tingting bilong ole m long helpim manmeri i gro olsem humen manmeri.

"Tasol samting we Kristen edukesen i save givim long edukesen em long developim pesenel rilesensip wantaim God long Jisas, na lainim long bihainim Jisas olsem wanpela aposel.

"Ol jenerel as tingting long edukesen i bilong kisim kwaliti edukesen na i stap long planti tredisenel edukesen sistem. Ol i hap bilong "noble tradition" we Mamalo na Edukesen Ekt i mekim olsem as long edukesen sistem bilong yumi," bung i harim.

Bung i tok laspela as tingting i no stap long karikulum na as tingting namba 4, (developim

strongpela na gutpela man/meri we i save kamapim gutpela pasin) i stap long tupela gavman na sios edukesen ejensi, tasol i no develop gut.

Bung i tok, "yumi pilim no gut long korapsen, tasol yumi no trenim ol pikinini long vetju bilong "honesty" o stretpela pasin.

"Yumi agensim pasin ol polis i wokim long bagarapim pipel na sampela i sutim tok long polis trening, tasol asua i stap long karikulum long ol skul.

"Planti taim yumi mekim samting taim samting i kamap long sait bilong wokim samting i no stret. Yumi no save gat inapt aim long skulim ol pikinini ol sosel skil na vetju i ken helpim ol long bihainim gutpela na stretpela pasin na ol strongpela hat," bung i harim.

Lukautim Lutheran Sios histori: ...Tingim wok bilong ol tumbuna papa i autim Gutnius



Olpela Haus Lotu...

Sanang Zazoring i raitim

RAIPINKA Memorial Lutheran kongrigesen i kamapim wanpela komiti, em "Raipinka Memorial Lutheran Sios Developmen Tras (RMLSDT)", long kirapim wok bilong bungim na lukautim histori bilong Raipinka Lutheran Sios. Nesenol Musium insait long Goroka long helpim strongim dispela wok bilong kamapim na lukautim rekot.

Nesenel memba bilong Kainantu Open ilektoret i givim mani helpim long mekim dispela wok.

Wanpela bung i bin kamap long Sarere, 6 Jun, 2015 namel long RMLSDT wantaim tupela opisa bilong Nesenel Musim insait long Goroka, wantaim ol opisa i kam long Lutheran Sios het opis insait long Lae long toktok na painim rot bilong kirapim dispela wok long lukautim Lutheran Sios histori.

Bung i bin toktok long wanpela kain wok na sistem bilong wok i mas kamap long lukautim histori bilong Lutheran Sios insait long Raipinka na hailans.

Dispela komiti i gat bikpela amamas long Nesenel Musium opis long Goroka long helpim na lukautim rot bilong sevim rekot bilong sios histori.

Nesenel memba bilong Kainantu, Johnson Tuke, i givim pinis K100,000 long helpim na

mekim wok bilong lukautim histori bilong sios (conservation and preservation) bilong Raipinka Lutheran Sios na rekot bilong en.

Dispela prosek i kamap long wok bilong Raipinka kongrigesen aninit long RMLSDT insait long tingting na wok bilong lukautim rekot bilong Gospel ministri na wok bilong Lutheran sios i kam insait long Hailans rijen.

Kain prosek olsem i kamap namba wan taim em wanpela bilong ELCPNG kongrigesen i statim insait long hailans aninit long 'Raipinka Memorial Lutheran Sios'. Dispela kain wok i soim olsem, em i bihainim gutpela tingting na rot - long wmem, sios i gat planti samting na stori insait long histori bilong Lutheran Sios long lukautim.

Na em bai lukautim rekot bilong wok ol misinari i bin mekim wantaim ol dokumen na sios propeti long wok bilong namba wan lain wokman bilong Lutheran Sios wantaim misin bilong en.

Raipinka kongrigesen i lukim olsem, histori bilong sios em i bikpela samting.

Dispela i bin kamap long kirapim nupela laip na developmen bilong spirit bilong man na sindaun bilong olgeta pipel. Em tu i sut long mak bilong strongim histori bilong Lutheran Sios i bin kisim strong long Raipinka na karim Gutnius i go insait long ol-



BELO I GAT HISTORI: Olpela sios belo long ples Obasega, Morobe provins.



Olpela Haus Misinari.

geta hap bilong hailans rijen.

Wok bilong RMLSDT em Reveren James Agusave i bin blesim i kisim maus bilong Reveren Dokta Zirajukic Kemung, long las yia.

Raipinka Memorial Lutheran Sios i gat nem olsem wanpela bilong ol namba wan Lutheran sios kongrigesen bilong ELCPNG long kirapim kain prosek olsem.

Reveren Wilhelm Bergmann wantaim ol evanjelis bilong Finsafen i bin helpim na sanapim.

Wokmisiin insait long hailans i kisim sapot na strong bilong en long Raipinka stesin ol i krungutim ol ples haiden insait long hailans na autim Gutnius na tokaut long misin bilong God i kisim bek olgeta manmeri insait long wok bilong Jisas Kraus.

Namba wan Lutheran misinari Reveren Wilhelm Bergmann i bin kirapim Raipinka na Onerunka misin stesin.

Long dispela hap, ol i kisim strong na go insait long hailans rijen namel long 1932 na i go antap.

Wanpela bilong mak i soim piksa bilong dispela wokmisiin bilong Lutheran Sios em, 'Ol pipel long dispela taim i bin karim wanpela haus long Onerunka na i kam sanapim long Raipinka stesin.

Dispela haus i sanap yet long Raipinka nau. Dispela haus i soim mak bilong ol tumbuna papa bilong ol Lutheran husat i bin tanim na kamap Kristen. Dispela i soim ples klia strong bilong God insait long Gutnius i kisim bek kantri Papua Niugini.

Paia sefti em i wok bilong planti gavman dipatmen



Insait long las 6-pela mun, paia i bin bagarapim ol bisnis na ol haus bilong ol famili long planti hap bilong kantri. Lae siti i kisim taim stret bikos long bikpela bagarap paia i kamapim long 4-pela bikpela bisnis insait long 4-pela mun. Na long ol arapela hap bilong kantri i gat ripot i kamap tu long paia i kukim ol klasrum o gavman opis o haus slip bilong ol sumatin.

Planti mani i lus, kampani i katim daun namba bilong ol wokman, na i mas painim nupela ples bilong wok bisnis o bai ol i klinim ples na sanapim nupela haus gen. Olgeta dispela samting i kostim bikpela mani tru. Ol bikpela bisnis i gat insurens tasol planti ol famili i no gat insurens bilong haus na taim papa i kukim haus, ol i save painim taim stret.

Tasol ol insurens kampani tu i save lusim bikpela mani tru long baim insurens bilong paia. Long dispela wik, ol i autim belhevi bilong ol. Ol i wari olsem gavman na ol siti atoriti i no bisi tumas long stretim ol samting bilong stopim paia olsem ol paia haidren long strit o sekap long ilektrik waia bilong ol nupela haus na ol olpela haus tu. Ol i askim tu long wanem kain helpim i go long Paia Dipatmen long strongim na kamapim gut wok bilong ol.

Paia sefti em i bikpela samting. Husat gavman dipatmen o siti atoriti i stap insait long dispela samting i mas mekim wok bilong ol. Long ol plen bilong ol strit, i mas gat inap paia haidren. Dis-



Mi no insuarim haus..Nau haus i paia..olgeta moni i lus long paia..bai mi mekim wanem nau?Gavman bai helpim mi o nogat..

Jada 015

pela em i ples bilong paia trak i pulim wara bilong kilim indai paia. Tude dispela samting i no stap moa. Ol nupela haus developmen i kamap tasol i no gat ol paia haidren. Ol kampani i tingting long kisim rent mani tasol ol i no wari

sapos i gat paia haidren.

Na long sekap long ol ilektrik waia em narapela bikpela samting. Em i wok bilong PNG Pawa o bilong ol praiwet ilektrik kampani? I mas gat klia tok save long dispela.

PNG i winim 40 yia nau na yumi lukim planti moa senis i kamap long ol taun na siti. I gat moa haus na ol bisnis na developmen i wok long surik i go moa yet autsait long taun. Tasol i no gat gutpela plen bilong ol nupela haus developmen

we olgeta strit i mas gat ol paia haidren. I no gat lo tu long stopim ol pipel long rausim ol paia haidren o karamapim o banisim dispela impoten samting. Em i wok bilong siti atoriti long lukluk long dispela samting o nogat?


Bikman bilong Paia Sevis i bin toktok long ol samting dipatmen bilong em i nidim long strongim wok bilong ol. I mas gat ol nupela paia trak. Ol wokman i mas gat gutpela trening long mekim wok bilong kilim indai paia. I mas gat ol paia haidren we paia trak inap pulim papim wara sapos ol i sot. Na i mas gat gutpela awenes long ol pablik long paia sefti long haus na ples bilong wok.

Paia sevis i wanpela han tasol bilong gavman. I gat ol arapela tu husat i mas mekim wok bilong ol long lukautim sefti bilong propeti. Wok bilong ol bilding inspekta em i narapela impoten wok. Olgeta samting i mas stap stret bipo long givim tok orait long ol pipel i yusim haus, o opis o bisnis.

Tude long ol kain ples olsem Mosbi siti, yumi lukim ol naispela haus i wok long kamap wantu na planti bilong ol i go antap tru. Tasol wanpela bikpela askim em long taim bilong paia. I gat inap rot bilong stopim paia long ol kain haus olsem o nogat? Na i gat inap ol paia haidren long ol dispela eria tu o nogat? Na em i wok bilong husat tru long lukautim paia sefti? Dispela em sampela askim i stap long tingting bilong ol manmeri long taim ol i harim ripot bilong paia i kukim ol haus na ol bisnis.

Stail KILIM YUMI

Yu ting ol stua kaikai i dia tumas...hehehe, traim na baim K1.00 kumu long maket...skin bilong yu bai surik stret...



Sori tru..takis bilong maket i go antap. Ol samting i dia nau..

Yu save wok gaden tu?! Baim tasol na go pinis!!

Lusim kumu bilong mi na klia i go long narapela hap!!

Tripela lip tasol long K1.00 kumu?! Oloman!! Putim ol 20toea!

Maski long giaman! Yu baim long sampela hap na kam salim gen long hia! Yu no luk olsem meri bilong wok gaden!

Kokonas bilong ol Rigo

Jada 015!



Published Weekly, Thursday, for Word Publishing Company, Ltd. P.O. Box 1982, Boroko, NCD Papua New Guinea Telephone: (675) 325 2500 Fax: (675) 325 2579 Email: editorial@wantok.com.pg Websait: www.wantokniuspepa.com Pe bilong wanpela via. 52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager Elizabeth Konga Editor Veronica Hatutasi

Published at Able Building Complex, Sec 58 Lot 02, Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.



PIH Saveman *Nius*

"I kam long Pacific International Hospital Port Moresby"

Ph: 311 3000/ Mobile: 799 88000 Textline 7155 8866 Website: www.pih.com.pg

RHEUMATIC FEVER : ANOTHER BACTERIAL THREAT

Another threat that is caused by bacteria is Rheumatic fever, which is caused by the group A streptococcus bacteria (streptococcus pyogenes). And the worst case scenario is when Rheumatic Fever leads to Rheumatic Heart Disease.

A few international news networks last week were telling the story of 17-year old Reynaldo Nilo from the Philippines, who was from an impoverished family, and was going to travel all the way from the Pacific to Africa, in Khartoum in Sudan to be given free open heart surgery courtesy of the Italian organization Emergency (featured in the Oscar awards nominated documentary "Open Heart").

It may start off initially a strep throat or scarlet fever, and usually affects younger people from 5 years of age to 15 years of age. Though becoming rare in developed nations due to antibiotic use, it can still fairly occur in developing countries. It is essentially an inflammatory disease.

The sad thing is that there is no vaccination available yet to specifically ward off rheumatic fever. And its symptoms may remain "hidden" in the person until it is already affecting the heart. The streptococcus bacteria seems to more likely occur in situations of overcrowding and poor sanitation. There are no "surefire tips" that can be said about the locations or settings where this bacteria originates from.

Rheumatic fever signs and symptoms — which result from inflammation in the heart, joints, skin or central nervous system — may include:

Fever

Painful and tender joints — most often the ankles, knees, elbows or wrists; less often the shoulders, hips, hands and feet

Pain in one joint that migrates to another joint

Red, hot or swollen joints

Small, painless nodules beneath the skin

Chest pain
Heart murmur
Fatigue

Flat or slightly raised, painless rash with a ragged edge (erythema marginatum)

Jerky, uncontrollable body movements (Sydenham chorea or St. Vitus' dance) — most often in the hands, feet and face

Outbursts of unusual behavior, such as crying or inappropriate laughing, that accompanies Sydenham chorea

When to see a doctor

Your child should see a doctor if he or she has signs or symptoms of strep throat. Proper treatment of strep can prevent rheumatic fever. Call your doctor if your child has any of the following signs or symptoms:

A sore throat without cold symptoms, such as a runny nose

A sore throat accompanied by tender, swollen lymph glands (nodes)

A red rash that starts at the head and neck, then expands to the trunk and extremities

Difficulty swallowing anything, including saliva

Thick or bloody discharge from the nose, which is more likely in children under 3 years of age

A bright red tongue with bumps all over it, known as strawberry tongue

Left untreated by antibiotics at an early age, the bacteria causes reactions within our body's immune system that results in the internal inflammation.

The deadly consequences crop up once the inflammation gets to affect the heart.

This infection causes swelling and muscle damage to the heart. It can also damage the heart valves in a way that keeps the blood from moving through the heart normally. The infection can cause heart valve leaflets to stick together, which narrows the valve opening. Also, the infection can scar the valves. This keeps the valves from closing

tightly, so blood leaks backward in the heart.

If the aortic valve is narrowed, this problem is called aortic valve stenosis.

If the mitral valve is narrowed, this problem is called mitral valve stenosis.

If the valve does not close tightly and blood leaks backward, the problem is called aortic valve regurgitation or mitral valve regurgitation.

But very rarely there is isolated valvular lesion of stenosis or regurgitation, there is combination of stenosis with regurgitation.

Once it is already a case of Rheumatic Heart Disease, then the solution is open heart surgery.

DR.O.P.SHARMA, the MEDICAL DIRECTOR AND CHIEF CARDIOTHORACIC AND VASCULAR SURGEON, PIH, when interviewed said,

"The rheumatic valve disease is a big challenge in a way that the disease damages the heart valves to quite a great extent by the time it is diagnosed.

There is calcification of the valve and /or multiple valves and this prevents the chances of repair of the valves and only option left is valve replacement.

Because of a latent period of 15-20 years there is rise in the pressure of the lung's arteries also and this with time gets worse.

Since rheumatic heart disease gets diagnosed late as it is a disease of low socio-economic group the management of rheumatic valve disease becomes quite tedious.

More often than not the patient ends up having valve replacement surgery of one or multiple valves and then the patient is bound to be on blood thinning medicines for rest of his or her life.

With the newer valves the patient can live a normal life but needs to get regular check up with the cardiologist and heart surgeon."



One affected by rheumatic heart disease, the only solution is open heart surgery, which is now available all year round at the new PIH.



Public service Announcement:

FREE SURGERIES FOR CLEFT LIP AND CLEFT PALATE WILL BE HELD IN OCTOBER AT THE PACIFIC INTERNATIONAL HOSPITAL COURTESY OF OPERATION OF HOPE DOCTORS FROM THE U.S.A. IF YOU HAVE A RELATIVE WITH CLEFT LIP, PLEASE SEND PATIENT DETAILS EITHER BY FACEBOOK, LIKING FB PAGE "PIHkinini Smile" , OR EMAIL publicrelationspih@gmail.com OR TEXT TO 7155-8866.



Now in PNG..the country's first Retina Surgeon

3-Mile Specialty Clinics, 3-Mile Hill, Taurama Road, Port Moresby

Advance Equipment for better diagnosis:

- OCT (Optical Coherence Tomography) to study optic nerve and retina.
- FA (Fluorescein retinal Angiography for diabetic and other retinal vascular diseases)
- A/B Scan (Eye Ultrasound) for more precise diagnosis of posterior segment of the eye
- AUTO R/K Automated Refraction and Keratometry

Procedures for better outcome:


- RETINA LASER for diabetic and other retinopathies
- YAG LASER capsulotomy (for after cataract haze)
- Cryotherapy (cryo-treatment)
- Intravitreal Injection for Diabetes

Tel. 311-300
email:
pihopd@gmail.com
text to 7155-8866



Em nau! Ol pikinini i ken painim rot i go long ples wantaim Wantok kru...

Sudoku



5		9	8		4
	7	2		6	8
			5	1	9
	7		5	2	1
			4		
	3	5	8		4
	5	8	6		
	6	5		8	7
7		1	4		6


9	5	6			
	2		9	5	6
7		1			8
	2		7		3
	7		8		5
8	9	5		7	
5	8		1		2
		4	8	6	7
			4	3	8

Ansa bilong Sudoku # 111 na # 112 neks isu


6	9	4	7	1	3	5	8	2
2	8	1	9	6	5	4	3	7
7	3	5	8	4	2	6	9	1
4	1	2	5	9	8	3	7	6
8	6	9	4	3	7	2	1	5
3	5	7	1	2	6	9	4	8
5	7	3	2	8	4	1	6	9
9	2	6	3	7	1	8	5	4
1	4	8	6	5	9	7	2	3

9	3	4	6	2	5	7	1	8
2	6	8	1	7	4	5	3	9
7	5	1	3	9	8	4	6	2
6	4	9	8	1	7	3	2	5
8	2	3	4	5	9	6	7	1
1	7	5	2	6	3	8	9	4
4	8	6	9	3	1	2	5	7
5	1	2	7	4	6	9	8	3
3	9	7	5	8	2	1	4	6

Ansa bilong las wik Sudoku # 109 na # 110



EM ORAIT




EM NOGUT

Ol wod lista hia:

- ATING
- AUTIM
- BILASIM
- BANARAS
- BOKIS
- DRAIVIM
- DOKTA
- EKELESIA
- ETPELA
- FOTO
- GLASIM
- GRINPELA
- HANI
- HOLIM
- INSAIT
- KIBUNG
- KIRAPIM
- KISIM
- LOKIM
- LOLIWARA
- MEME
- MOGA
- NOIS
- ORAITIM
- PASPOT

L O I T C G M B A M J S D H N H C N V P
 E N C E S G S P G R L T J L X W O A E F
 M I Q J S O N C E E D O S H W N I O H R
 X H G E E F T E V Z B N E A A N M A E T
 N U E D S H G A V C F E P L C G H U S E
 H E Y P X M P F C F I R E Y N A F T T H
 C P X V H Q N P G E S P N U E P L I D E
 T X Q R T N P T Y E T Z B J B A A M G E
 J S I E F I C V Q E C I S W A S F L Y Y
 P B O N E D L D H F K I H E N P B K E N
 H T R M I T F O T O K E O I A O L I Z A
 F S G N Q T V K K O D X L G R T J R R X
 X M X W P F S T B I M G I E A G H A N I
 L I O O M G C A E I M E M E S R W P A D
 C O W L E S L B S B L O D N M I Y I K R
 R A T V F Y S A N Z S A S I L N A M D A
 T S E A S S L T N I X E S O E P O G G I
 Q N J R I G P I O J L I L I A E E O T V
 H S B R M T L N L A K A N E M L M M A I
 L G G R W H P G J G S T P O R A I T I M

Ansa bilong Wod Pilai isu 2126





TOK PISIN NEWS

from Radio Australia

radioaustralia.net.au

Harim TOK PISIN long
Radio Australia
101.9FM
Port Moresby

Tok Pisin Service

6am - 7am 6080; 7240(KHZ)

7pm - 9pm 5995; 6020; 9710; 1280(KHZ)



Nupela Praim Minista bilong Vanuatu.



Meri lida bilong Solomon Ailan, Lisa Horiwapu. Ol Foto:ABC

Nupela Bogenvil gavman i mas sapotim turisim

WOK turisim inap helpim planti pipel long Bogenvil, winim wok maining.

Dairekta bilong Turisim long Bogenvil, Lawrence Bele taim em i mekim dispela toktok i tok nupela Atonomas Bogenvil gavman i mas putim planti moa mani long apim na strongim turisim bisnis long Bogenvil long wanem, em bai helpim planti pipel.

Mista Bele i tok tu olsem Bogenvil i gat planti kain samting ol pipel bilong ol narapela kantri i ken lukim olsem, klinpela enviromen, ol bikpela bus, kalsa na tu planti samting bilong Wol Wo 2 i stap nabaut long olgeta hap bilong Bogenvil.

Em i tok tu olsem planti bikpela turisim sip i wok long go raun nau long Bogenvil, tasol ol i laikim turisim bai kamap olsem wanpela bikpela wok we nap long helpim ol pipel.

Vanuatu i gat nupela gavman

Nupela Praim Minista bilong Vanuatu, Sato Kilam, i tok ol i gat rait long ranim gavman.

Nupela Fainens na Ikonmik Menesemen Minista bilong Vanuatu long nupela gavman bilong Praim Minista Sato Kilman i bin fainens minista tu bipo, Willie Jimmy, i tok, ol i gat rait long senisim gavman long wanem ol i gat namba long palamen.

Em i tok politik em i wok long namba na sapos ol i gat namba, ol i ken senisim gavman wanem taim ol i laikim.

Mista Jimmy i tok olsem bihain long palamen bilong Vanuatu i rausim Joe Natuman long wanpela mosen bilong no gat bilip aste, na votim Sato Kilman olsem nupela praim minista.

Tupela ten seven memba nau i sapotim mosen na tupla ten faif i bin agensim dispela tingting.

Praim Minista bipo, Joe Natuman i bin rausim Sato Kilman husat i bin wok olsem foren minista long wik i go pinis.

Dispela em ol nupela lain kabinet memba bilong Vanuatu.

Praim Minista: Sato Kilman Livtunvanu (People's Progress Party)

Deputi Praim Minista na Minista bilong turisim: Moana Carcasses Kalosil (Greens)

Minista bilong Finance: Willie Jimmy Tapangararua, (Independent)

Minista bilong Intenel Afeas: Hosea Nevu, (Iauko Group)

Minista bilong Foren Afeas: Serge Vohor Raliuth (Union of Moderates)

Minista bilong Helt: Morkin Steven latika (Union of Moderates)

Minista bilong Egrikalsa: Christopher Emelee (Vanuatu National Party)

Minista bilong Pablik Wok: Tony Nari (Iauko Group)

Minista bilong Lens: Paul Telukluk (Reunifikesen long Muvmen bilong Senis)

Minista bilong Edukesen: Alfred Carlot (Natatok)

Minista bilong Klaimet Senis: Thomas Laken (Greens)

Minista bilong Yut na Toara Daniel Kalo (Greens)

Minista bilong Jastis: Dunstan Hilton (People's Progress Party)

Fainens minista, Willy Jimmy, i tokim Radio Australia olsem ol i gat rait long ranim gavman long wanem, ol i gat namba long Palamen.

Ol Pasifik kantri i lukluk long ol hevi

OL Pasifik kantri we i bin gat ol conflict o pait insait long ol wan wan kantri yet i bin bung long Fiji long toktok long ol hevi i bin kamap long ol kantri bilong ol.

Ol dispela kantri ya em long Fiji, Solomon Ailan, Tonga, PNG na Atonoma Rijen bilong Bogenvil.

Fiji i bin gat ol pait bihainim ol politikel ku o hevi em ol ami i tekova, PNG na Bogenvil i bin pait long 10- pela yia, Solomon Ailan tu i bin gat ol "ethnic conflict" o wan pisin hevi, na Tonga i bin gat pait wantaim ol Saina bisnis pipel.

Dispela bung i kam aninit long Global Association Against Armed Conflict na ol i bin holim long Suva long Jun 1 i go inap long de namba 5.

Long Solomon Ailan, National Council of Women nau i wanpela long ol lain husat i wok hat long stretim ol kros na belhevi namel long ol pipel blong Guadalcanal na Malaita.

Josephine Teakeni, Dairekta bilong Vois ilong Mere we em i hap blong NCW i bin makim Solomon Ailan long dispela bung.

PNG marit loa

PNG lida meri i tok em i sapotim tingting bilong gavman long stopim ol pipel i marit pastaim long 18-pela krismas.

Helen Hakena dairekta bilong Leitana Nehan Developmen Egensi long Bogenvil i tok emi sapotim tru

tingting bilong PNG gavman long kamapim lo long stopim ol pipel long larim ol yangpela pipel we krismas bilong ol i stap aninit long 18-pela krismasi save marit.

Misis Hakena i tok PNG na ol narapela Melanesien kantri i gat bikpela wari long planti pikinini meri i save karim pikinini taim krismas bilong ol i stap aninit long 18 krismas.

Long dispela taim, PNG i no gat lo long stopim ol yangpela pipel tru long marit, na ol i laik lukim dispela nupela lo i ken lukautim laip na sindaun bilong ol yangpela pikinini.

PNG Polis i mas skul long human rait

DISPELA em askim bilong wanpla senia niusman husat i sutim tok long polis long paitim em no gut tru, Dairekta bilong Nesenel Brotkasting Kopresen provinsel redio long Westen Hailans, Jacob Kaka i tok.

Wok bilong skulim ol polisman meri long PNG i mas karamapim luksave long Human Raits bilong ol pipel, na no ken paitim na bagarapim ol nating.

Mista Kaka i mekim dispela askim taim em i sutim tok long sampela polis man bilong Hagen long paitim em long wiken i go pinis.

Mista Kaka i tok em i bin traim long helpim ol yangpela pipel em ol polis i bin paitim ol long wanem, ol i no bin baim mani long geit bilong lukim Digicel Kap ragbi namel long Eagles na Mioks.

Polis long PNG i gat nem no gut long sait blong disaplina na tu, ol i save paiting nating ol pipel. Olsem na Mista Kaka i tok ol i mas kisim longpela taim long trening long pinisim ol dispela kain pasin no gut.

Mista Kaka i tok em i wok long lukluk nau sapos em bai kotim ol dispela polisman o no gat.

PNG i rausim ol strit pikinini pastaim long Pasifik Gems

OL papa-mama i mas lukautim gut ol pikinini bilong ol na no ken karim ol bilong bilasim Papua New Guinea tasol, Neseenl Kapitel Distrik (NCD) Metropolitan Superintendent, Andy Bawa i tok.

Mista Bawa i mekim dispela toktok long sapotim wok em Nesenel Kapitel Distrik Komisin i mekim long rausim ol strit pikinini

long strit pastaim long Pacific Gems long mun bihain.

Long dispela taim, planti pikinini i save raun nating na askim o beg long mani long Mosbi siti we bai hostim Pasifik Gems bai stat long Julai 4 July i go long de namba 18.

Dispela wok i stap aninit long Lukautim Pikinini Lo we i tok ol papamama i mas lukautim gut ol pikinini na no ken larim ol i bungim vailens na helpim ol tu i go long skul.

Dispela lo i tok tu olsem ol inap kalabusim ol papamama sapos ol i no lukautim gut ol pikinini bilong ol.

PNG PM i lonsim ID projek long Westen Hailans

DISPELA wok em i bilong putim nem bilong olgeta sitisen long wanpela rigista.

Praim Minista bilong Papua New Guinea, Peter O'Neill, long las wik i bin lonsim Nesenel Aidentifikesen Projek long Moun Hagen, biktaun bilong Westen Hailans provins.

Dispela projek i stap aninit long wok bilong gavman long registaim olgeta manmeri na pikinini long kantri.

PNG i gat samting olsem 7 milien pipel na olgeta i mas gat name blong ol long despela rejista.

Ol i bin statim dispela wok long 2014, tasol nau gavman i wok long go long olgeta provins long tok klia na helpim ol pipel i save gut long dispela projek.

As tingting blong dispela wok em bilong helpim gavman wantaim planti kain wok, olsem long taim bilong ileksen we em inap stopim ol pipel i save vot planti taim.

Dairekta bilong provinsel redio long Westen Hailans, Jacob Kaka, i bin stap long dispela bung long moning, na em i tokim Redio Australia olsem planti pipel i sapotim dispela projek bilong gavman.

Solomon Ailan meri na midia

OL meri i mekim wok painimaut long wanem kain stori em midia i save karim long ol meri bilong kantri.

Lisa Horiwapu bilong Vois Bilong Mere em NGO bilong Nesenel Kaunsel bilong ol Meri long Solomon Ailans i tok.

Em i tok Solomon Ailans i bin mekim wanpela sevei o wok painimaut long ol stori bilong ol meri long ol nius midia long kantri i no long taim i go pinis.

Vois Bilong Mere i bin mekim

dispela seve aninit long Global Media Monitoring Program.

Mis Horiwapu i tok as tingting long dispela seve em long painimaut long namba na wanem kain stori bilong ol meri ol nius midia i save karim.

Em i tok ol dispela kain infomesen o stori i ken helpim ol long save long wanem i stap, na tu, long helpim long sait long ol polisi i karamapim ol meri.

Mis Horiwapu i tok dispela kain wok painimaut i no stap tasol long Solomon Ailan, tasol em i stap tu long ol narapela kantri long Wol.

Sapot bilong Solomon Ailans PM i go daon: Sosel midia i tok

Despla i kamap bihainim wok painimaut em sosel midia i mekim na soim olsem sapot long Praim Minista, Manasseh Sogavare, i no strong tumas nau.

Benjamine Afuga, CEO bilong Forum Solomon Ailans Intenesenel Facebook i tok Solomon Islands i soim olsem sapot long PM i bin go daun tru insait long 6- mun em i bin stap ranim gavman.

Dispela wok painimaut bilong Forum Solomon Ailans Intanesenel Facebook long ol memba bilong en i soim olsem sapot long Praim Minista Sogavare i bin go daun long 58 persen long dispela taem.

Mista Afuga i tok namel long ol samting we ol pipel i no laikim nau em long sapot bilong praim minista long ol memba bilong palamen i no baim takis long gavman.

Vanuatu Tafea provins i orait

SAIKLON Pam i bin bagarapim planti samting long Vanuatu long mun Mas na Tafea provins nau i luk grin olgeta tripela mun bihainim long saiklon Pam i bin hamarim kantri long mun Mas.

Dispela level 5 saiklon i bin kamapim ol planti bagarap na ol bikpela heve long ol pipal long klostu olgeta provins.

Tafea provins we i karamapim ol ailan olsem Tanna, Aneityum, Futuna, Erromango na Aniwa i bin bungim tu ol bikpela hevi.

Tasol nau ples i luk gut na ol pipel i stat ken long kaikai long ol gaden bilong ol.

Joe Nare Mete em i wanpela lokal kaunsila long Erromango i toktok long dispela samting.

Maru na Pipols Maikro benk sainim K500,00 agrimen

Stanley Nondol i raitim

PIPOLS Maikro Benk na Distrik Developmen Atoriti o DDA bilong Yangoru Saussia Distrik i sainim Memorandem ov Agrimen bilong K500,000 long putim Maikro Kredit Skim long helpim ol pipel bilong Yangoru Saussia Distrik long sapotim ol long SME bisnis.

Minista bilong Tred, Komes na lindastrai na Memba bilong Yangoru-Saussia, Richard Maru i tok em i mekim disisen long putim mani long sapotim ol pipel long kirapim bisnis na mekim i go bikpela tasol em tok strong olsem ol pipel i mas sevim mani long statim bisnis na i no ken wetim fri mani bilong gavman long statim bisnis.

Minista Maru i tok "sevim mani na kisim yu bai no inap kisim sapos yu no sevim mani long statim bisnis na helpim yu yet".

Aninit long Maikro Kredit Skim, distrik bai putim hap na husait i laik kisim dinau mas i gat hap mani. Em olsem sapos wanpela aman o meri laikim dinau long K4000, em i mas i gat K2000 long Pipols Maikro Benk na distrik bai putim K2000.

Aninit long dispela skim, Pipols Maikro benk bai no inap lusim wanpela mani. Sapos man o meri i no

bekim dinau, hap mani bilong em bai benk i kisim wantaim hap bilong distrik.

Na intres bilong lon em 12 pesen. Dispela em olsem traim projek we Yangoru Saussia Distrik i traim na sapos em i wok orait em olgeta 89 distrik long kantri i ken yusim dispela rot long helpim ol pipel long groim na statim ol SME bisnis.

Minista Maru i tok em i putim K500,000 long dispela yia na narapela K2milien em bai putim long 2016 long helpim SME bisnis.

Minista Maru i tok ol pipel bilong kantri i no ken wet long kisim fri mani long gavman. Em i tok bikpela as tingting bilong dispela em long helpim ol man long sevim mani na traim mekim sampela samting long kisim helpim long gavman na benk.

Ol pipel long Yangoru Saussia i ken kisim dianu long K1000 go mak long K20,000.

Aninit long dispela agrimen, sapos wanpela man o meri i no bekim dinau bai no inap kisim moa dinau long olgeta benk na fianensel institusen long kantri bikos nem bilong ol bai go insait long Kredit Databeis Biuro o CDB.

Minista Maru i tok em i tambu long kisim dinau aninit long dispela agrimen long salim bia.



Minista Maru i makim DDA bilong Yangoru Saussia na givim K500,000 long Pipols Maikro Benk.

PNG Ports i namba wan SOE

PNG Ports Corporation Limited (PNGPCL) long namba tri taim long dispela yia i kisim awod olsem nambawan SOE long ol developmen bilong Human Risos program kampani i mekim.

PNG Ports i kisim dispela awod long PNG Human Risos institut (PNGHRI) long anuel konprens long las wik. Namba wan taim em i kisim wankain awod em long yia 2012.

Sif Eksektiv Opisa (CEO) bilong PNGPCL, Stanley Alphonse i tok dispela awod i soim ol wok kampani i mekim long sapotim Nesenel Gavman long givim gutpela trenspot sevis i go long ikonomi bilong kantri na komitmen bilong kampani long gro na kamap strong long PNG.

Mista Alphonse i tok kampani i wok hat long gro na wantaim gutpela bod, gutpela menesmen na ol hatwok bilong ol opisa, kampani bai gro na i ken mekim winmani na baim dividen long ol seaholda na ol as

tingting bilong kampani i ken karim kaikai.

Humen Kepitol menesa bilong PNGPCL, Rex Kini i tok, PNG Ports bai go het wantaim ol gutpela wok na em i kisim ol rait wokman na meri bilong wok hat long groim kampani.

Mista Kini i tok tenkyu long PNGPCL long trenim ol wokman na meri long wok na tu long ol i go long ol konprens bilong HR long kisim moa save long wok bilong ol.

PNGHRI em i wanpela ogenaiesen we i go pas long ol isu na toktok bilong ol wokman na meri long ol ogenaiesen long kantri.

Wanwan yia PNGHRI i save holim konprens we olgeta mausman bilong olgeta kampani na gavman ogenaiesen i save go bung wantaim long toktok long ol salens na ol hevi bilong HR long wokples.

Long 2012 PNG Ports i winim awod olsem nambawan SOE na namba wan HR prekrisina bilong yia.

PNG-LNG i salim namba 100 kago

PAPUA Niugini Likwifaid Naturel Ges long PNG LNG Projek we ExxonMobil PNG Limited i lukautim i bin salim namba 100 kago mak long pinis bilong dispela wik.

Dispela kago em ol i bin salim i go long Tokyo Elektrik Pawa Kampani long Japan. Dispela em i kampani we i bin baim namba wan kago pinis long Me, 2014.

I kam inap nau, LNG i salim 7 milien na moa tan kago pinis, taim projek i stat long wokim ol kago long Epril, 2014.

Bosman bilong ExxonMobil PNG Limited, Andrew Barry, i tok, " dispela em i gutpela

sain bilong PNG LNG i soim olsem em i namba wan produsa bilong ges."

"Methane Spirit em i sip we i karim ol kago i go long ol narapela kantri na dispela em i namba wan wok we wol klas feseliti i wokim," Barry i tok.

"Dispela sip em i 286 mita long longpela bilong em, bikpela bilong em i 43 mita na em i save karim 163000 kubik mita ges, na ol i wokim dispela sip long yia 2008."

Projek i stap pinis long kamapim 9 trilien kubik fit na moa ges insait long dispela 30 yia operesen taim.



PNG LNG i save salim ol kago i go long ol narapela kantri long dispela sip.

Kampani bai lukautim ol ples balus

OL ples balus bai go long han bilong ol kampani long lukautim.

Lihir, insait long Nu Ailan Provins, em i namba wan ples balus we ol i putim long han bilong wanpela lokal kampani, Kunaye Investment Limited (KIL).

Sif Eksekyutiv Opisa bilong Air Niugini, Simon Foo, i tok olsem KIL i kisim Lihir ples balus na sels operesen long Me 1, 2015, na em i wanpela ekspirien kampani we i gat planti gutpela rekot long wok insait long ol ples balus. Em i gat inap save long kamap long mak bilong ol PNG Svil Aviesen na Septi Atoriti (PNGCASA) save laikim long en. Sikspela wok man bilong Air Niugini bipo,

husat ol i pinis long Air Niugini long dispela yia bikos ol i bungim taim we Air Niugini i save makim. Nau ol i wok wantaim KIL na ol bai lukautim operesen na ples balus gut, bikos ol i gat planti ekspirien long wok insait long balus kampani.

Air Niugini bai givim aut planti ol ples balus na ol operesen long ol kampani long klostu taim.

Bihain long Lihir em ol bai givim Bulolo ples balus long Morobe Provins, bikos ol i redim olgeta ol senis wok pinis.

"Air Niugini i toksave pinis long ol pipel olsem, husait kampani i gat ol mak we PNG-CASA i laikim long en bai kisim ol dispela bles balus na lukautim," Mista Foo i tok.

MORE DIRECT FLIGHTS MORE CONNECTIONS TO AUSTRALIA



BRISBANE

13 times weekly from POM*



CAIRNS

11 times weekly from POM**



SYDNEY

2 times weekly from POM

Air Niugini
www.airniugini.com.pg
EXCLUSIVE CARRIER FOR THE 2015 PACIFIC GAMES



* POMBNE twice daily except for Sat.
** POMCNS twice daily except for Tue/Wed/Sat.
CNSPOM twice daily except for Wed/Thu/Sun.

For more schedule information, go to www.airniugini.com.pg

Eileen lambu bai skruim Rais Projek

Philemon Tame i raitim

EILEEN lambu em i wanpela meri long Amadibaga viles insait long Kairiku-Hiri Iektoret long Sentrel Provins.

Em i bin wok wantaim Steam-Ships Limited na em i risain, long wanem em i lukim olsem Trukai Indastris Limited i painim graun long planim rais long las yia na Eileen i sanap pinis long givim graun bilong brata bilong em, Boi Ovia, long Trukai Indastris.

Boi em i hai skul tisa na em i papa graun long Amadibaga eria we ol i givim 4-pela hekta graun i go long Trukai Industri long planim rais.

Trukai Indastris i planim rais pinis insait long dispela 4-pela hekta eria na em i putim long han bilong Eileen long lukautim dispela projek.

Long las wik Fraide, ol i lonsim dispela rais projek na ol i kamautim namba wan rais ekta we em i redi pinis. Trukai Indastris i givim wanpela masin bilong kamautim rais na ol i yusim dispela masin long mekim namba wan wok lon kamautim rais.

Eileen i amamas long wanem, driman bilong em i karim kaikai taim dispela 4-pela hekta rais gaden em i redi gut long em bai salim wantaim Trukai Indastris na tu, i lukim planti lain manmeri i kam lukim dispela projek bilong lonsing seremoni.

Em i tok, "nau mi lukim olsem dispela projek em i wanpela bikpela samting we mi makim long kisim kam insait long Amadibaga eria. Nau mi bai givim 100 hekta moa long Trukai Indastris long skruim dispela projek i go moa. Na bikpela samting tu em, mi i kisim dispela projek i kam insait long Amadibaga eria na lainim ol pipel bilong Amadibaga viles long ol i ken bihainim na mekim dispela kain wok, bikos ol i gat bikpela hap graun we bus i karamapim na ol i no save mekim sampela gutpela wok long dispela graun bilong ol."

Dispela kain projek i gat tripela as tingting we gavman, kantri na ol pipel bai kisim helpim. Em bai helpim ol viles manmeri husat i no go long skul na stap long ples kanaka i ken kamap didiman na kisim mani long painim gutpela sindaun, taim ol i givim graun bilong ol. Namba tu as tingting em, dispela kain pojek em i bilong mekim moa mani bilong dispela kantri na laspla as tingting bilong dispela kain projek bai helpim dispela kantri long givim kaikai long ol pipel long wanem populesen i wok long gro bikpela yet.

Eileen i tok tenkyu long ol famili memba bilong em long ol i helpim em long olgeta taim long wok insait long dispela projek eria. Em i tok tenkyu tu long sampela manmeri long Amadibaga viles husait i givim sampela liklik sapot na aidia, bikos planti lain i kam lukluk tasol na ol i no helpim em long projek bilong em.

"Dispela projek i karim kaikai na ol manmeri i kirap nogut long statim dispela kain projek na em i wanpela bikpela samting we dispela eria bai senis," Eileen i tok.

Memba bilong Kairiku-Hiri i tok long helpim ol pipel insait long Kairiku na Hiri wantaim ol DSIP mani long skruim dispela didiman wok i go bikpela moa. Maket i stap pinis long ol bai salim ol rais bilong ol na tu trukai i stap long helpim ol long strongim dispela projek moa.

Trukai Industri i mekim gut long ol pipel i ken painim gutpela sindaun long bihain. Em i gat plantim projek insait long kantri. Em i gat bikpela rais projek insait long kantri em long ls Niu Briten Provins na em i 30,340 ekta graun. Long dispela, 18,000 i stap long Kimbe na biialla.

Insait long Sentrel Provins, Trukai Industri i lukluk long tupela hap long Kairiku na Hiri long planim rais. Vanapa/Vekabu em i 20 km na Amadi em i 80 km taim yu stap long Mosbi na i go antap olsem long Hiri Tano Haiwe. Amadi em eria we Eileen i givim long Trukai Industri long planim rais.

Long Vanapa/Vekabu, ol papa graun i givim 30,000 ekta graun pinis long em bai orait long kamapim bikpela rais prodaksen. Wanpela viles man, Gabriel Haino, i planim rais long liklik hap bilong dispela eria na i kamautim na salim long Trukai Industri pinis. Dispela em i soim olsem rais i ken gro insait long Sentrel Provins.

Dispela em i masin bilong kamautim rais we Trukai Indastris i givim long Eileen lambu long Amadigaga Rais Projek.



Eileen lambu long han sut na Boi Ovia long han kais i sanap paslain long Rais Projek bilong tupela.

Paniman bilong Yumi FM kamap long Madang Festival

...Amamasim pablik

MADANG Festival long Kwin's bonde wiken i bin kamap gut tru wantaim planti tumbuna singsing, danis, ol string ben na ol narapela samting moa long amamasim pablik long en. Ol bisnis haus tu i bin gat sans long soim ol samting i karamapim ol wok bisnis bilong ol na long promotim ol tu.

Tasol ol manmeri na pikinini bilong Madang taun i bin kirap no gut long lukim na harim paniman bilong Yumi FM, Fada Enifuka na Castie kamap long Madang Taun na stap long festival. Mangi Lo Ples balus kampani i bin kisim Fada Enifuka i go long Madang.

Pablik long Madang Taun i bin amamas long lukim stret pes bilong dispela man i gat nem long wokim ol pani stori na pilai long Yumi FM, we ol manmeri i sindaun long ol kar na ol PMV bas long Mosbi na olgeta hap bilong kantri go long wok olgeta moning i save kilim dai long lap long harim ol pani stori na pilai bilong dispela Fada Enifuka.

Long piksa, midia wokman bilong Ramu Nikel, Mathew Yakai wantaim meri bilong em Maggie i sanap wantaim Fada Enifuka namel na kisim piksa wantaim em.



Stori na Poto: Mathew Yakai

Planti selebresen i bin kamap long Wol Environmen De

POTO i soim wanpela wokmeri bilong BSP benk i givim aut ol prais na dispela em wan wan piggy benk long wina bilong liklik resis long bungim wantaim ol paswod bilong ol wan wan tent long ol kampani na ogenaissen i bin stap insait long selebresen long Nature Park.

Olgeta manmeri i go insait long ples bilong selebresen i bin kisim wanpela pepa na taim ol i raunim olgeta tent o selhaus na painim ol paswod, ol i kisim dispela hap pepa i go long BSP tent, soim hap pepa na kisim prais olsem wanpela piggy benk, kep na fen.



Poto na stori: Veronica Hatutasi

06/06/2015



Tupela Ramu NiCo Opisa helpim mama grup opim benk akaun bihain long trening

RAMU NiCo Menesmen (MCC) Limited i save promotim wok bilong ol meri insait long Projek eria bilong en long Madang provins insait long Komyuniti Afes sasteinabol divelopmen wok program bilong en.

Gutpela piksa i bin kamap long las wik Trinde taim moa long 48 mama bilong zon 2 insait long wod 17 long Usino LLG long Madang provins i kisim trening long helpim sindaun bilong ol long rurel viles na haus lain bilong ol. Dispela gutpela trening em tupela Komyuniti Afes (CA) fil ekstensen opisa, Samuel Masawa wantaim Seth Win i kamapim yusim gutpela save ol i gat long helpim ol turangu rural mama long ples.

Wod 17 insait long Usino LLG i stap insait tu long Paiplain Eria bilong Ramu NiCo Project, na ol wok lain bilong divelopa bilong nikel/kobalt projek, Ramu NiCo Menesmen i save go pas long helpim ol pipel long ples long wanem ol agrikalsa projek long kamapim gutpela sindaun long ples na komyuniti

Trening em Mista Masawa na Mista Seth Win i ronim i karamapim poltri prodaksen (rot na wei bilong lukautim kakaruk) na sasteinabol living.

Dispela trenina i stat long Jun 1 i go Jun 5, na insait long dispel faiv-de trening ol mama i lainim planti nupela samting na kisim gutpela tingting long lukautim sindaun bilong ol yet insait long femili, komyuniti na eria bilong ol.

Long las wik Trinde, bihain long dispela 5 de trening, Mista Masawa wantaim Mista Seth Win i ogenaisim o redim rot bilong ol lain long Nationwide Microbank long go long Iguruwe viles long bungim ol mama na givim sampela aweanes long sait long lukutim moni long benk.

Tupela opisa blong Nationwide Microbank em Georgina Niangu na Jeremiah Ruado, husat i go wantaim draiva bilong ol long dispela liklik bung long ples Iguruwe.

Tupela strongpela man bilong toktok na hatwok long promotim wok agrikalsa long Usino eria, Samuel Masawa wantaim Seth Win i tok klia olsem dispela trening long poltri prodaksen i givim tingting long ol mama long gutpla rot long lukautim kakaruk, na kamapim kiau na tu rot long salim na kisim mani long helpim ol rurel mama long ples.

Seth wantaim Samuel i tok klia tu long sait long sasteinabol laivilhud trening.

Samuel i tok dispel trening em long opim tingting bilong ol meri o mama long ples glasim ol yet na wanem luksave i stap long helpim sindaun bilong ol wantaim femili taim ol i yusim gut taim na tingting bilong ol gut tru.

Seketeri bilong Zon 2 Wimen grup long wod 17, Philinda Jeffrey i tok amamas long ol lain opisa bilong benk long go givim naispela ol skul toktok long sait long sevim mani na tu ol helpim benk i ken givim long ol rurel pipel.

Misis Jeffrey i tok olgeta ol mama insait long trening em ol mama blong ples na planti ol nupela samting long sait long sevim mani long benk long taun em nupela long ol. Olsem na go bilong ol lain long Nationwide Microbank long Iguruwe ples i gutpela tru na i givim gutpela sans long ol mama long harim ol toktok na lukluk moa long sevim moni.

"Mipela amamas tru olsem yupela lain bilong Nationwide Microbank i kam stret long ples bilong mipela na long haus-dua bilong mipela long mipela i ken harim toktok bilong yupela na tu opim benk akaun long ples stret" Misis Jeffrey i tok.

Ramu NiCo CA agrikalsa seksen supavaisa, Allan Wahwah i tok amamas long ol mama long kisim ol trening na i strongim ol wantaim salens olsem ol i mas sanap strong na wokim wok na sevim mani na lukim mani bilong ol i gro. Na long bihain gutpela senis i ken kamap long laipstail bilong femili,

komyuniti na tu gutpela bihain-taim bilong ol pikinini bilong ol.

Mista Wahwah i tok strongpela toktok tu long ol meri long menesim gut moni ol i kisim na plenim gut olsem mani bilong lukautim wok bisnis i mas go stret long wok bisnis, moni bilong yusim i mas go long wok bilong en stret.

Wanpela mama i tok dispela trening bilong poltri prodaksen na sasteinabol laivilhud i opim stret tingting bilong ol meri long ples long wokim kamap ol liklik investimen long moni ol i kamapim na wanem gutpela eria ol i ken investim long en.



Ol mama long zon 2 long Usino LLG wod17 i pulmapim fom long opim nupela benk akaun wantaim MiCash long ples Iguruwe las Trinde.



Naispela welkam long ol Nationwide Microbank Opisa long ples Iguruwe.



Ol mama givim presen long strongpela wokman bilong Ramu NiCo Samuel Masawa.



Ramu NiCo Management (MCC) Ltd,
the manager of Ramu NiCo Project is proud to host the 5th
NATIONAL MINING EMERGENCY RESPONSE CHALLENGE
in Madang

Date: August 22-25, 2015
Venue: DWU & PNG Maritime College



An initiative of:
National Apex Mining Safety Council



Under the auspices of:
Mineral Resources Authority

Sevim envairomen i ken helpim man long sevim mani tu

Veronica Hatutasi i raitim

SEVIM envairomen i ken helpim pipel long mekim ples na kantri i stap klin, skulim ol famili long lukautim ples bai stap grinpela na i ken helpim pipel long sevim mani.

Jenerel Menesa bilong Pot Mosbi Nature Park (PMNP), Michelle McGeorge i tok long Wol Envairomen De selebren i bin kamap long Park long Sarere June 6.

Planti memba bilong pablik insait long Mosbi siti i gat long en planti skul pikinini na ol liklik pikinini i bin amamasim de long Nature Park long raunim ol tent na hat we 17 kampani na ogenaisesen i bin putim kamap long givim ol awenes skul long envairomen long dispela de.

Het tok bilong 2015 Wol Envairomen de em: "Kliinpela na Grinpela Siti bilong Yumi."

Mis McGeorge i tok as tingting bilong PMNP long holim dispela selebren em long skulim pablik long lukautim envairomen na helpim Mosbi na kantri i stap kiln na grin.

Em i tok skulim ol famili "green conservation" i wanpela gutpela samting.

Wanpela piksa long dispela em long tangwara (water tank).

"Yu gat tangwara em i gutpela bikos bai yu gat wara bilong dring, kuk na wokim londri o wasim klos long en. Long dispela rot, bai yu sevim wara na mani.

Sola enoji o sola pawa i narapela. Em bai helpim gut pipel na ol no inap lukluk tasol long pawa. Yusim sola pawa bai yu sevim mani na pawa.

I gat ol narapela samting we ol tent na hat i soim long skulim pipel long yusim gut, lukautim na sevim envairomen.

Tasol olgeta samting em long skulim yumi long ol rot bilong sevim envairomen na tu, long helpim yumi long mekim ples i stap klin na sevim tu mani.

Dispela de tu em i taim bilong askim yumi wan wan olsem wanem samting yumi wan wan i ken mekim na tu, taim yumi olgeta i putim han wantaim," McGeorge i bin tok.

Nature Park i hostim ol program bilong Wol Envairomen de long las tripela yia nau.

Long Jun 6 selebren, 17-pela ejensi, non gavman ogenaisesen na gavman dipatmen i bin stap insait long karimaut ol wok edukesen awenes long lukautim envairomen, bus, graun na wara, yusim sola enoji long sevim pawa na mani, tang long kisim renwara na sevim wara na mani, mekim ples na envairomen i stap kiln na ol pikinini i bin gat ol ektiviti long skulim ol taim ol i liklik yet long lukautim envairomen.

Olgeta manmeri na pikinini i bin stap long selebren i bin sans tu long raun insait long Pak na lukim ol animal olsem pukpuk, muruk, ol kain pisin, ol diwai na ol arapela samting bilong netsa moa.

Planti ol samting we ol kampani na ol NGO i bin soim i gutpela long yusim tu long ol ruel ples.



NCDC WASTE MENESMEN: Ol skul pikinini i kisim skul long wokmeri bilong NCDC Waste Menesmen long no ken tromoi ol kain kain pipia long ol wara na solwara bikos em bai bagarapim solwara, ples we olgeta pipia i save go long en.



OL ARoB VISITA: Em i namba wan taim long tupela brata na susa, em Wayne na Angeline, long raun insait long Nature Park na tu, stap insait long ol selebren na ol i bin amamas stret.



PISIN: Retpela na grinpela perot, Kalangar long Tok Pisin, i wanpela long ol pisin i stap insait long Nature Park pablik i save amamas long lukim.



PIPIA PIKSA: Ol pikinini i lukim rot we ol pipia i go long en. Ol pipia olsem ol tin i save blokim ran bilong wara na i no gutpela long tromoim i go long wara.



SNEK: Tupela wokman bilong Park i holim na soim pablik dispela bikpela snek ol i kolim long paiton we ol i save lukautim long park.



KOKI: Waitpela koki em i feveret pisin bilong planti i stap tu long Nature Park.



TANGWARA: Tangwara bilong kampani Tuffa i gutpela long taun na ruel eria. Em i strongpela na bai no inap ros na em bai stap longpela taim.

TPNG i go paslain long SASWAC ran

Philemon Tame i raitim

TRENSPARENSI Intanesenel PNG (TIPNG) i amamas na tokaut olsem Tim PNG (TPNG) i go paslain na sapotim namba 9 yia ran bilong Sir Anthony Siaguru Wokabout Agens Korapsen (SASWAC) long las Sande long Jack Pidik Pak.

Ol i statim dispela wokabout long 6-klok moning na pinis long 9-klok na ol i wokim dispela ran long Kokopo, Lae na Kimbe tu.

Long sait bilong Pasifik Gem, as bilong dispela yia ran em "KANTRI BILONG YUMI, GEM BILONG YUMI na YUMI RAN STRET," na insait long dispela as, yumi bai singaut long wanbel pasin i ken stap wantaim yumi ol pipel bilong PNG long 2015 Pasifik Gem na yumi sapotim TPNG.

Dispela gutpela pasin bai stopim korapsen.

Korapsen em i wanpela samting i save bagarapim yumi, tasol em i ken stop sapos yumi i wok bung wantaim na bihainim ol gutpela pasin tasol.

TIPNG i tok tenkyu long husat ol bisnis haus, ogenaisesen, famili, spot klap na ol narapela moa i rejistaim tim bilong wakabout agens korapsen.

TIPNG i ripot olsem "85 kopret tim, 63 skul tim, 6 Sivil Sosaiti Ogenaisesen tim, 15 famili tim, 2-pela spot klap tim na olgeta namba em 2,500 lain manmeri i wokbung wantaim."

"Ol narapela ogenaisesen na famili i tingting long kam registaim tim wantaim TIPNG long wok wantaim em i gutpela moa, bikos taim em i no pinis long yupela i regista," TIPNG i ripot.

SASWAC em i bikpela fan resing na awenes wok bilong TIPNG na ol bai skruim dispela fan resing i go aut long olgeta hap bilong PNG.

Tim PNG i sanap wantaim hetmeri bilong TIPNG long taim TPNG i tokaut olsem em bai go paslain long SASWAC ran. *Piksa: Andrew Molen*



Strongim pablik long sapotim gut Team PN ...Opisel sapot singsing

I GAT opisel Team PNG singsing we PNG pablik na ol sapota bai yusim long singaut na strongim tim long en.

Sif de Misin bilong Team PNG, Richard Kassman, i tokaut long dispela samting long dispela wik.

Em i tok wanpela samting ol hom tim long spot i save amamas na kisim strong long ol pilai resis em sapot na singaut bilong ol sapota, na Team PNG i wok long lukluk long bikpela sapot long pablik.

Mista Kassman i strongim ol pipel olsem ol skul sumatin na ol komyuniti long PNG long lainim ol dispela singsing long

soim sapot long taim bilong Pasifik Gems.

Mista Kassman i tok ol bai givim ol dispela singsing o "chants" i go long ol redio stesen na midia na putim kamap long pablik i harim, lainim na ol i ken save na singim olsem sapot long Tim PNG.

Em i tok ol sapota long olgeta veniu i ken singim na strongim ol etlit long pilai strong na win.

Daunbilo em ol singsing:

Singsing sapot 1 em:
U-oh PNG Ohhhhh (x2)
Trupla Kumul blong yu-mi
Stap lo papa-grau

Go, Go Team PNG
Em taim blong yu-mi nau!

Singsing sapot 2:
Ka-lap (clap),
Saik up (clap),
PNG em taim blo yu-mi
Ku-mul, Ku-mul i stap we?
Kumul i stap ya
Yu stap, mi stap, PNG stap!
Kumul stap lo fom!

Singsing sapot 3:
PNG with all our might,
Black, yellow, red and white,
We will fight and make a stand,
United tribes as one land!
Hoo Haa, Warrior Blood,
Haaa, Hooo, Kumul trul!

Taurama Akwatik Senta i redi ...Bai traime long Sande

PABLIK long Mosbi bai gat sans long lukim nupela Taurama Indo Akwatik Senta taim ol i opim dispela wol klas veniu long Sande moning long 9 klok moning na bai op inap long 4 klok apinun.

Eksekutiv Opisa bilong Gems Ogenaising Komiti (GOC), Peter Steward i tok em i laikim pablik long go na helpim ol long testim ticketing na sekyuriti sistem, pak na raid na sevis i lukautim ol man i go lukim pilai pastaim long ol gem i stat klostu taim.

Dispela em i namba wan taim long veniu ya i op long pablik i ken lukim ol wok ol i bin putim long mekim na i redi nau long em i kamap long wol klas level.

Boroko Swimming Klap bai traime dispela Olimpik sais 50 mita swimming pul, stat long 9 klok moning inap long 12 klok belotaim.

Indo Senta we ol bai pilaim sampela pilai bai ol i pilaim ol tes pilai olsem man

na meri basketball na volibal. Ol bai pilaim tu taekwondo na karate na em bai wanpela eksen pek de.

Ol dispela tes pilai bai fri long pablik long go lukim.

GOC bai testim o traime ol tiketing na sekyuriti sek sistem long get long kontrolim hamas manmeri i go insait long mak inap we veniu i ken kisim, na tu, long lukim olsem veniu i seif long olgeta i stap insait

Bai no gat pablik paking long Taurama Akwatik Senta, tasol Park na Ride sevis bai operet long Mari Bareks fil.

NCDC Shatel bas bai kisim ol manmeri long Park na Ride ples.

Nomol PMV sevis bai wok na askim i go long pablik long Mosbi long sapotim na helpim GOC long traime wokfos na ol sistem bilong em.



Nupela wolklas Taurama Akwatik Senta. *Poto: GOC Mida*

Karitas i gat nupela jim

Esther Bralyn Wani i raitim

DEPUTI Praim Minista, Leo Dion i opim nupela Don Cimatti Hal long Karitas Teknikel Sekenderi Skul insait long Nesenel Kapitel Distrik long las wik Fraide.

Ol bikman na meri bilong gavman na Katolik Sios tu i stap insait long dispela opening. Em ol meri bilong Praim Minista, Linda Babao O'Neill, Minista bilong Spots, Justin Tkatchenko, Gavana bilong Nesenel Kapitel Distrik, Powes Parkop, Asbisop Michael Banach, Presiden bilong PNG Olimpik Komiti, Sir John Dawanincura na ol narapela.

Deputi Praim Minista i amamas long ol Bod bilong Menesmen long pinisim dispela Hal na tu long 20 yia aniveseri bilong skul.

Em i tok edukesen em i wanpela bikpela samting long gavman bilong nau. Em i tok ol i

mas skulim ol pipel na olgeta pipel i mas save long stap long strong bilong ol yet na ol i no ken lukluk long gavman tasol.

Dispela Hal bai ol i yusim long taim bilong Pasifik Gems long neks mun. Ol spots olsem bodi bilding, tebel tenis na boksing bai kamap long hap. Taim Gems i pinis ol sumatin bai i yusim long pilai insait long en.

Olgeta spika husat i toktok i amamas long Bosmeri bilong skul, Sista Florentina husat i no save les long wok strong long long mekim ples i senis. Em i ogenaisim ol volantia long mekim fanresing long kamapim dispela bilding na bihain gavman i luksave long ol wantaim K4 milien long kamapim dispela wok wantaim helpim bilong gavman bilong Korea.

Long wankain taim, tripela sumatin meri bilong dispela skul yet bai resis long taikwando kompetisen long taim bilong Gems.



Ol papamama bilong ol sumatin wantaim ol sumatin long baksait long insait long nupela Don Cimatti Hal long Karitas Teknikel Sekenderi Skul.

wokim ol las raun bilong em pastaim em i kam bek long Mosbi na redi long namba 15 Pasifik Gems i stat long Julai 4.

Long dispela wik, Baton i stap long Atonomas Rijen bilong Bogenvil bihain em i lusim Is Nu Briten na raunim provins na lukim ol pipel, ol skul na ol ples i gat ol nem long ol. Pastaim em i bin wokim raun long Galp Provins.

Bihain long ARoB, Baton bai kam long Sentrel Provins long neks wik Jun 24 na long Jun 29, em bai kam bek long NCD na go insait long opening seremoni long Jun 4 insait long Mosbi siti. Raun bilong Baton long olgeta hap bilong kantri i kirapim tingting na sekim ol pipel bilong dispela kantri long bikpela pilai bai kamap klostu taim long PNG.



MIPELA STAIL YA: Dispela tripela pikinini i bilas gut stret na bungim na holim Baton taim em i go kamap long ples bilong ol. *Poto: MadNESS Photography*

Blues i winim ol Maroons 26 - 18



i kam long bekpes

Klostu long hap aua mak, Greg English i karim bal wantaim stail i go klostu long Queensland mak na Billy Slater wokim set ap. Long 32 minit na 20 sekens stret Greg English yet i go na putim namba 2 trai bilong sait bilong Queensland. Tasol kik bilong Jonathan Thurston i no go insait na ol Maroons i stap yet long skoa 10.

Na long pinis bilong namba wan hap bilong gem wantaim wanpela gutpela penalti kik i kam long Trent Hodkinson, NSW Blues i wok long go pas wantaim skoa bilong 14 na Maroons wantaim skoa 10 tasol.

Long namba 2 hap bilong gem tupela tim i strong i go inap long 42 minit Jonathan Thurston sevim wanpela gol long Nu Saut Wels Blues na long 46 minit

Maroons Matt Gillet i putim wanpela moa trai na kik long Jonathan Thurston bringim skoa bilong ol i go long 16.

Wanpela moa penalti kik i kam long Jonathan Thurston i bringim skoa bilong Maroons i go long 18.

Bihain long dispela, ol NSW Blues kisim bal bek gem na long 61 minit bikpela Aaron Woods i putim hotpela trai long as bilong ol gol pos stret na bringim skoa bilong Blues i go long 18 na wantaim kik long Trent Hodkinson ol i kisim skoa nau i go long 20.

Queensland Maroon traim hat long holim yet mak bilong ol tasol wanpela moa taim strong bilong Greg English i go nating taim em i kisim bal fran long 10 mita long gol pos bilong em yet na ran i

go long putim trai 80 mita long mak bilong ol NSW. Tasol em i bin kamap long nok fowod olsem na vidio referi rausim dispela trai. Dispela i makim pinis bilong ol Maroons long putim skoa.

Blues nau i karim bal long 68 minit wantaim wanpela skram na i go putim trai long 69 minit taim Josh Dugan i putim narapela moa trai bilong Blues long namel stret bilong gol pos na i bringim skoa i go antap long 24. Trent Hodkinson gen i kikim las gol i go insait na em nau, ol Blues kisim win bilong namba 2 origin gem wantaim 26 poin na lusim Queensland Maroons wantaim 18 skoa tasol.

Em nau resis em i go hot nau. Husat bai winim las fainel origin gem em i stap long yumi lukim nau!

Ol foto i kam long ABC



Des Hasler i hariapim NRL



KOSA bilong Canterbury Bulldog, Des Hasler, i hariapim Nesanel Ragbi Lig (NRL) long stretim toktok long redim Orijin, bihain long ol Bulldok i lus taim ol i pilai wantaim ol Gold Coast Titan long Sande.

Hasler i belat na i tok olsem dispela NRL pilai em i no stret long klostu taim bilong Origin, tasol Wayne Bennett i amamas long Titans i win.

Ol namba wan pilaia bilong Bulldog TrentHodkinson, Josh Moris, Brett MorisJosh Jackson na David Klemmer i no pilai na James Graham tu i no pilai long em i bin kisim bagarap.

Ol bulldog i pilai gut long namba wan hap, taim wanpela pilaia bilong ol Titan, Kepten Nate Myles, i no pilai, bikos long mekim sampela wok bilong Origin gem, tasol long namba tu hap, ol Taiten i kisim strong na i winim dispela gem wantaim 28-14.

"Dispela gem em i kirapim birua pasin, long wanem ol 34 namba wan pilaia bilong mi ol i no pilai," Hasler i tok.

Ol pilaia husat i no pilai long en,

em ol i painim bikpela mani taim ol i pilai long Blues, tasol Origin em i tripela gem tasol insait long wanpela yia, na NRL i stap long stretim wari long planti taim insait long wanpela yia.

Het man bilong gem streteji long NRL, Shane Richardson, i kondaktim gem rivyu long mekim nupela straksa bilong ragbi kalenda long narapela brokas dil bai stat long 2017, tasol Hasler bai no inap kisim bel isi kwik taim, long wanem em bai kamap long bihain olgeta.

"Nau olgeta manmeri i toktok long Origin olsem em i bikpela na gutpela samting i kamap na ol i amamas," Hasler i tok.

"Mipela bai no inap painim taim no gut long olgeta taim. Nau em i taim bilong yumi long painim taim no gut tasol long taim bipo, Broncos na Storms tu i save bungim dispela kain taim."

Em i tok moa olsem, olgeta samting i save kam long pinis bilong ol, na nau mipela bai putim long han bilong ol man husat i gat pawa long senisim dispela samting klostu taim.

Baselona i winim Juventus wantaim 3-1 gol long Berlin long winim namba 5 lig



BASELONA i kamap king bilong Yurop long namba 5 taim, taim ol i winim Juventus wantaim 3-1 gol long bikpela Sempion Lig fainel long Berlin long Sande. Ol i winim taitel tripela taim long wanpela sisen.

Ivan Rakitic i skorim gol long namba 4 minit, Luis Suarez long 68 minit na Brazilian Neymar long pinis bilong taim i pasim gem wantaim namba 2 win, bihain win long 2009 taim ol i winim La Liga taitel na Kap bilong King long Spanis.

Ol Itali i no win olsem Juve, husat i bin kamap namba wan tim long histori bilong kompetisen long lus long 6-pela fainel olgeta, na ol i lus long las 4-pela.

Wol Kap bilong ol meri: Norway i winim Tailen 4-0 long mekim strongpela stat

SOKA tim bilong ol meri long Norway i laik kisim bek win na ol i winim Tailen wantaim 4-0 long opening bilong Wol Kap Grup B mes bilong ol Wimen long Mande (AEST).

Kepten Trine Ronnig i senisim wanpela fri kik long 15 minit na straika Isabell Herlovsen i skorim namba wan haf long net taim ol Tai i traim hat stret wantaim ol strongpela oponen bilong ol.

Norway i kamap namba 11 long wol rekot. Ol i bin wanpela soka tim bilong ol meri long stap strong na i winim Wol Kap long 1995. Tasol Jemeni na Yunaitet Stets i bin winim ol na ol i no bin stap long opening grup long 2011 tonamen.



Meri Kriket Skwad kisim nem long pilai long 2015 Pasifik Gems

INTERNESNEL Kriket Kaunsil (ICC) Is Asia Pasifik (EAP) i tokaut pinis long meri skwad bilong pilai long 2015 Pasifik Gems we bai kamap long Pot Mosbi long Julai 6 i go pinis long Julai 11, 2015.

Ol tim we bai resis long tonamen em Papua Niugini, Fiji, Vanuatu, Cook Islands, New Caledonia na Samoa. Dispela bai namba wan taim long meri kriket long pilai arere long ol man kriket long Pasifik Gems.

Resis bilong ol meri bai kamap olsem taim bilong kwalifai long 2018 Wimen Wol T20, na em i min olsem tupela top EAP tim bai kwalifai long trai-seris egens long Siapan long ya bihain.

“Pot Mosbi meri kriket tim i go insait long Pasifik Gems em i bikipela samting. Tasol, ol Pot Mosbi meri kriket bai taitim bun moa bikos ICC i

patna wantaim Pasifik Gems Kaunsil long mekim dispela taim bilong pilai i kamap olsem ples bilong makim wanem tim bai go insait long 2018 ICC Women’s World T20 tonamen” ICC’s Rijonal Developmen Menesa bilong Is Asia-Pasifik, Kieran McMillan i tok.

“Em i wanpela taim bilong amamas long ol meri kriket long wol na T20 stail i soim gutpela sans stret long kamapim ol kriket kantri long putim mak bilong ol long wol stes, olsem long Pasifik kantri na i go daun long ol spot meri husat i gat stail, pawa, na pasin bilong taitim bun.” McMillan i tok.

Namba wan raun pilai resis bai stap long Mande Julai 6 wantaim ol fainel long kamap long Sarere 11 Julai. Olgeta pilai bai kamap long Bisini Spot Kompleks na ol skoa bai kamap laip long EAP websait.

PNGRFL i tok tenkyu

PAPUA Niugini Ragbi Futbal Lig (PNGRFL) i tok tenyu long olgeta pipel long givim gutpela sapot long SP Hunters long pilai long nupela BSP Stedium long las Sarere we pastaimol i kolim ‘Sir John Gais Stedium.’

Intras Supa Kap Raun 14 gem wantaim Souths Lagon Magapies em i traim pilai kamap pastaim long ol bai pilaim Pasifik Gem, tasol olgeta manmeri i amamas na Gems Ogenaising Komiti (GOC) tu i amamas.

CEO, Peter Stewart, i pilim orait long dispela gem i win pinis olsem ol i save laikim long en.

PNGRFL, siaman Sandis Tsaka, na Interim CEO, Shane Morris, i amamas long olgeta manmeri i bin stap long givim sapot na ol Hunters i bin winim dispela gem.

“Yumi laik tok tenkyu long olgeta pipel olsem polis, sekyuriti, ol wok manmeri bilong GOC, opisa bilong yumi yet, na olgeta pipel long mekim dispela gem i kamap gut i go long arere,” PNGRFL i ripot.

Ol i tok tenyu tu long gavman na i tok olsem, “dispela bikipela wol klas fesiliti na ol narapela fesiliti ol bai yusim long taim bilong PG i givim taim long pipel bilong PNG long kisim spot i go long narapela level moa.”

“Tok tenkyu tu i go long ol manmeri husat i kam stap long lukim gem, bikos ol stap wantaim wanbel pasin long dispela nait taim na em i soim wanpela gutpela piksa long yumi bai kisim sampela moa samting long dispela kantri bilong yumi,” Tsaka i tok.

SP Hunters i win wantaim 34-12 i strongim ol Hunters na Michael Marum wantaim ol pilai bilong em i putim rekod olsem ol i winim 7-pela taim wantaim no gat lus.

Dispela em i namba wan taim we ragbi lig gem long PNG i pilai aninit long lait long nait.

Ol i bin salim 15,000 tiket long Fraide na olgeta tiket i pinis insait long sotpela taim. Dispela em i namba wan taim we olgeta tiket i pinis insait long wanpela de.



Papua Niugini Skwad: Pauke Siaka (C), Tanya Ruma (VC), Kaia Arua, Helen Buruka, Boni David, Veru Kila Frank, Kopi John, Mairi Tom, Varoi Igo Morea, Ravini Oa, Konio Oala, Norma Ovasuru, Brenda Hoi Tau, Hinamutawa Philip. Kasa: Rodney Maha.

DCI stretim ples bilong intagreted infomesen sistem bilong Pasifik gems

DIPATMEN bilong Komyunikesen na Infomesen (DCI) na PNG 2015 Pasifik Gems Limited i sainim MoU long tupela ogenaisesen bai wok bung long promotim 2015 Pasifik Gems wantaim gutpela infomesen sistem.

Seketeri bilong DCI Paulias Kornu na Sif Eksektiv Opisa (CEO) bilong PNG Gems Ogenaising Komiti (GOC) Peter Stewart i sainim MoU long Data Senta long Telikom Rumana Haus long Pot Mosbi long Jun 11 2015.

DCI i ranim na menesim Nesenel Data Senta we i gat PNG gavman intagreted Gagman infomesen Sistem (IGIS) Netwok sistem i gat tele na video konprens fasiliti.

PNG 2015 Pasifik Gems Ltd Bai holim XV Pasifik Gems long Julai 4 i go long 18 2015 long Pot Mosbi.

Moa long 3,000 etlit, 500 ofisa

na 1000 teknikel opisa bai kam long 24 kantri insait long pasifik wantaim Australia na Nu Silan. Na bai pilai long ol 28 pot insait long 14 de.

Aninit long MoU DCI na PNG 2015 Pasifik Gems Ltd bai wok wantaim na wantaim helpim bilong ol arapela gavman ejensi bai plen, ogenais, na mekim wok bilong helpim Pasifik Gems long kamap gut.

DCI bai putim ol trening senta insait long Nesenel Data Senta long fran plua wantaim konprens rum, video na telekonprens fesiliti long GOC bai yusim long Pasifik gems.

GOC bai yusim Nesenel Data Senta long wok bilong Pasifik Gems na ol arapela wankain wok insait long tupela wik bilong gems.

Video Konprensg na telekonprens em hap wok bilong Gavman,

intagreted Gavman infomesen Sistem(i-G-I-S)Net.

As tingting bilong i-G-I-S em long olgeta gavman dipatmen long join wantaim ol provinsal senta na ol ejensi long go insait long nupela senis bilong infomesen na Komyunikesen Teknoloji na long daunim kos bilong gavman i save yusim bikipela mani long ol miting.

Ol sampela provinsal senta i gat link bilong i-G-I-S em olsem Goroka, Wewak, Rabaul, Vanimo, Rabaul, Kokopo i gat telekonprens fesiliti wantaim Nesenel Data Senta.

Seketeri Kornu i singaut long ol ejensi long join wantaim i-G-I-S na yusim nupela Teknoloji long dipatmen o ejensi bilong ol long mekim isi long Komyunikesen na infomesen.

SP PNG Hunters i go long Brisben

SP PNG HUNTERS bai go long Brisben long pilai namba 15 raun long Intrust Super Cup wantaim Tweed Heads Seagulls long dispela Sande.

Em i go wantaim top klas pefomens bilong em na em i lukluk i go pas long winim dispela gem tu.

Long las Sarere ol i pilai long nupela BSP Stedium i bungim bikipela namba, na em i namba wan taim ol i lukim dispela kain namba bilong ol manmeri.

Ol i mekim sia long mak bilong 15,000 manmeri bai sindaun na dispela spes i bin pulap pinis na ol i bin givim bikipela sapot we ol SP Hunters i win waintaim 34-12 na, ol Souths Logan Magpies i lus.

Dispela em i namba 7 taim we ol i win long lain, na em i givim bikipela strong long SP Hunters long ol bai salensim Seagulls long ples bilong ol long Pigabeen pilai graun long Sande.

Pastaim tu ol i daunim strongpela tim, Townville Blackhawks, long Townsvills long raun namba 11 na long raun namba 13 ol i win tu, na daunim narapela strongpela tim, Ipswich Jets long Kalabon pilai graun.


Kosa bilong SP Hunters, Michael Marum, i mekim liklik senis long lainap bilong ol pilaia, we em i putim Brandy Peter long kisim ples bilong Kato Ottio, bikos em i kisim bagarap.

Na em i putim Warren Clare long kisim ples bilong Peter.


Lista bilong ol pilaia bai pilai long Sande em: 1.Stargroth Amean, 2. Bland Abavu, 3. Noel Zeming, 4. Thompson Teteh, 5. Adex Wera, 6. Israel Eliab, 7. Ase Boas, 8. Henry Noki, 9. Wartovo Puaara, 10. Esau Suine, 11. Brandy Peter, 12. Lawrence Tu’u na 13. Adam Korave.



Ol spot komyuniti long Gerehu bai ranim gut ol pilai bilong ol nau. Tenkyu long Memba bilong ol na Helt Minista, Michael Malabag, long givim helpim long ol. Long Trinde dispela wik ol spot komiti long Gerehu i bin go kisim sek mani bilong ol long ranim ol liklik spot long wod bilong ol. Long poto Hagus Ali, ilektrol projek opisa bilong minista Malabag i givim sekim mani long K20, 000 i go long ol komiti bilong Gerehu spot. Foto: Nicky Bernard.



Kepten bilong SP Hunters Israel Eliab i kisim wanpela gutpela takol i kam long pilaia bilong South Logan Magpies.



Man bilong mekim pilai bilong Hunters Wartovo Puara i traim long saitim pilai bilong Magpies long pilai long Sir John Guise Stadium long Mosbi.



Adex Wera i ran long putim wanpela trai.



Ase Boas i kalap long namba wan trai bilong em. Em i bin putim tupela trai long win bilong ol 34-12.

Ol poto: Nicky Bernard



Thompson Tete i putim wan trai long nem bilong em.



Ol dai hat sapota bilong Hunters long Pot Mosbi.



Spot Minista Justin Tkatchenko i mekim toktok pastaim long pilai i stat. Ol narapela gavman lain tu i sanap na lukluk.



Dispela ol sapota em namba wan taim bilong ol long lukim PNG SP Hunters i pilai laip long ai bilong ol. Olgeta taim ol save lukim long TV tasol.

LINKING YOU TO MT HAGEN, TABUBIL & KIUNGA.*

Tuesday: Lae - Mt Hagen - Kiunga - Tabubil - POM
Thursday: POM - Tabubil - Kiunga - Mt Hagen - Lae

* New route commences June 06, 2015.

Call toll free on **180 5465** visit www.airniugini.com.pg or contact your nearest Travel Agent.



New Route





IMPROVED TASTE! Niupela teist wantaim planti mit na oil. Teistim na bai yu laikim moa yet.

DIANA

Tuna



Emi tuna
bilong PNG



Manufactured by



RD Tuna Canners Ltd.

Moa mit na
oil insait



TUNA IN OIL

Blues i win 26 - 18



Poto i kam long ABC

**Blues winim
Origin Gem
namba 2
wantaim
26 poin**

Frieda Sila Kana i raitim

LONG ai bilong 91,513 rekot kraut insait long Melbourne Cricket Grounds (MCG), Nu Saut Wales Blues Origin tim i kisim bek gutnem bilong ol wantaim bikpela skoa bilong 26, winim ol Maroons husat i kisim 18 trai tasol.

Oi NSW Blues i pasim tingting long win yet olsem na insait long 3 minit bilong gem yet ol i putim namba wan trai. Na i no husat, em dispela man bilong spit long Lig, Michael Jennings tasol i putim dispela trai. Wantaim gutpela kik i kam long Trent Hodgkinson NSW Blues nau i go pas wantaim 6 skoa.

Tasol narapela 6 minit bihain, Matt Scott bilong Queensland Maroons i putim wanpela trai na Jonathan Thurston i putim kik na i bringim skoa i go long 6 insait long 12-pela minit.

Bihain long 25 minit, Josh Morris i putim namba 2 trai bilong NSW Blues. Emi pundaun wantaim bal olsem na lains man i tok em i trai tasol referi tok long lukim vidio ref. Bihain long ol i sekim moa em nau vidio ref i tok em i trai. Smatpela kik bilong Trent Hodgkinson i bringim skoa bilong Blues i go antap long 12 bihain long 27 minit.

...lukim moa log pes 25

ISUZU
N-SERIES

the Perfect Business Partner.

BOROKO MOTORS Port Moresby 325 5255 Lae 472 1144 Madang 422 2659 Mt Hagen 542 1933 Goroka 532 3552 Kimbe 983 5035 Kokopo 982 8193 Tabubil 649 9048
Email: info@borokomotors.com.pg | Web: www.borokomotors.com.pg

